

文

恭

集

五





集 恭 文

(五)

撰 宿 胡

文恭集卷二十五

內制

賜新除參知政事曾公亮詔

國朝之制。設陪貳之職。以輔翼台宰。名數之重。下丞相一等。朕之選任。必屬賢髦。卿志度深沈。識裁詳密。以道術待朕。請以典冊宜王命。請治賓輔。擢尹京師。厥績茂焉。其試效已。是用升卿公府。參閱政道。采于讜者。罔無間然。冲挹之懷。遽形囊奏。雖謙風可尚。而命綽已行。勉思大猷。勿爲曲讓。

賜參知政事曾公亮乞退不允批答

省表具知。卿志行修明。風業夷遠。通習治具。洽練朝章。間繇禁聯。陪貳宰路。毅然有守。知無不爲。夙夜嬰煩。晦明虧裕。暫從謁告。適此養恬。卽當善平。入奉參決。忽得章請。來謝政塗。頗用憮然。事當議此。況廟堂之上。具有規隨。而機務之間。未至停瘞。勉輔藥石。宜安精神。勤味恬和。速期康復。

賜參知政事曾公亮乞退第二表不允批答

卿性度淑均。才識醇濟。預聞大政。陪貳上公。夙夜宜勞。臨明嬰恙。暫從頤衛。日冀善平。何遽貢章。乃求謝

職。且周官垂法。有寬疾之文。漢家養恩。著賜告之令。卿其少思省慮。味恬饗和。勿有疑焉。急就良已。

賜參知政事曾公亮乞退第三表不允批答

卿以耆明之姿。參嚴緼之政。謀謨匪懈。涉恪良勞。偶爽節宣。暫從頤衛。茲有生之未免。亦憂職之使然。賜告所存。養恩斯在。比觀章請。求謝宰聯。批諭已勤。控陳未已。況朝無闕政。而世方須才。勉圖粹和。速就康復。

賜參知政事曾公亮乞退第四表不允批答

卿精誠雅行。至範明猷。佐時矢謨。貳公圖政。偶嬰甚美之疾。適聞良已之書。比及暄辰。固加常膳。日期朝謁。跋閱話言。前已批章。復有今奏。懇求解罷。殊異眷毗。卿其研味眞腴。屏息煩慮。期于勿藥。慰茲側席。

賜參知政事曾公亮生日禮物口宣

陪貳宰司。贊襄治道。惟陽中應律之朔。乃閭左設弧之辰。政在尙賢。禮存嘉惠。侑茲燕喜。體我寵恩。

賜鎮安軍節度使行尙書右僕射檢校太師兼侍中判許州賈昌朝生日禮物詔

時惟舊德。位冠元侯。京室是陪。藩符攸總。誕期斯至。慶賜用覃。俾爰子舍之良。得致家庭之命。侑茲宴禮。示乃朝恩。

又

喬岳吐符。巖廊誕器。周旋二府。陟降三階。季商協辰。左弧在旦。馭貴有典。加惠著文。爰錫餼率。以及醪酒。

式將恩意往侑宴私。當體壽儀。卽祇慶賜。

又

陶元精之和。躬威德之美。蔚爲俊老。殿我輔邦。六射記辰。九秋肅氣。加惠隆于國典。爲壽盛于家情。俾爰似續之良。式將賚予之意。用資族宴。姑示朝恩。

賜山南東道節度使同中書門下平章事賈昌朝敕書

朕獲天人之助。乘畿夏之驪。祓除路朝。崇講祠事。以順衆志。以答靈休。日吉辰良。氣調時豫。熙典云究。慶賜是孚。卿王室元耆。人倫先覺。早冠居于鉉席。首敷變于化成。三讓彌冲。一德逾劭。居保釐尹正之重。有安輯勞徠之功。朕夙告成。乃眷斯在。進胙以爵。加惠于田。雖曰舊章。抑以疇德。已頒告于庶位。復往宜于朕懷。當體休成。同均慶賚。

賜山南東道節度使檢校太師同中書門下平章事賈昌朝口宣

卿德冠時宗。地居寰輔。鼎遷誕辰之節。泛推任子之恩。乃選上駟。來充內廐。羨名駒之奮發。煩駿足之效牽。載省寅恭。良增嘉尚。

賜賈昌朝口宣

朕慶數景至。恭事天明。禮典迄成。祥釐均被。卿朝家俊乂。藩岳饒刑。體貌所先。寵光宜厚。褒元功而進號。益多賦以衍田。馳遣使軺。奉將命綍。用敷休渥。當體眷毗。

賜賈昌朝赴闕茶藥口宣

卿留舊再司介圭入覲。爰屬秋暘之候。用勸參御之行。耆哲是勞。眷毗增厚。式頒藥劑。庸示寵私。

賜觀文殿大學士判亳州陳執中乞致仕不允批答

省所上表。陳乞致仕事。具悉。卿俊乂大臣。耆明碩老。再冠朝首。比讓台元。輔泰象財成之宜。得大雅進止之度。往治于亳。實陪厥京。僊藩在茲。蒙福多矣。如聞攝衛。稍虧和平。已出見于屬官。諒再加于常膳。舊德所至。臥理有餘。何乃上言。欲求謝事。是未亮憑賴之意。而規適宴之私。卿專精神。近醫藥。納養善氣。保固太和。避第仕塗。未可議也。

賜觀文殿大學士判亳州陳執中再乞致仕不允批答

卿器采精明。體韻方重。奕世濟德。先朝納忠。逮充舊貫之居。再處阿衡之首。將明典度。勵翼官師。朝有公言。朋無私謁。比辭政柄。屢避台階。靜勝柅于澆風。僊休寄于密甸。均勞近止。蒙福在焉。微有苦于足腓。遽見求于身退。茲豈藩鎮優耆德之意。朝廷待元老之心耶。卿其養精神。省思慮。淮陽臥理。西河僊藩。是所望于大雅也。

賜鎮海軍節度使判亳州陳執中特罪特放敕書

夫道隱不還。民散已久。刑之設惟五。而惡之討有十。敗俗之自。從古則然。卿舊老壯猷。俊德哲望。近辭時柄。事偃价藩。宣風有初。頒教尙淺。民之從違。政何加損。遽形引責。殊異眷毗。且諒寅恭。彌嘉愼畏。

賜昭德軍節度使知并州龐籍口宣

省所進奉賀正馬貳匹事。具悉。朕因三朝之吉。受四方之圖。方貢畢陳。朝慶大集。卿時惟俊老。殿我強藩。寅修述職之文。遠效充庭之禮。載馳上駟。來貢承華。有諒勤恭。良增嘉尚。

又

省所進奉謝恩賜牌印并公使及到任馬共六匹事。具悉。卿文武兼劬。風德竝優。業載賢公。望居俊老。朕以壺關襟帶。并土股肱。崇以高牙。殿于大鹵。甫頒條詔。初見吏民。宴犒有饒。公帑惟舊。至煩稱謝。乃有效率。滋顯勤恭。弗忘嘉尚。

賜新授觀文殿學士知鄆州龐籍口宣

卿國之耆俊。材號將明。二府迭更。一德咸有。懸辭時柄。倚臨東藩。得茲老成。居然治靜。圖中階之宿望。進書殿之偉名。異數有加。師言允稊。乃馳上駟。來實內閑。有嘉傾轡。良增歎屬。

賜工部尚書同中書門下平章事集賢殿大學士韓琦生日禮物詔

惟天所寶。若時相予。甫屬開秋。實惟誕日。稽諸朝範。寵于邦家。于是有牢醴蕃庶之錫。所以侑族宴而將壽嘏也。斯禮則舊。厥命惟新。祇若其承。體茲乃眷。

又

蔚以傑才。相予大政。首秋云吉。誕日在茲。俾按彝文。式將渥賜。庸示宰朝之寵。且爲族宴之榮。往惟欽承。

體茲眷矜。

又

體茲間氣。誕是傑才。素律云秋。左弧在旦。饒幸加惠。醪醴侑懷。佐族宴以在茲。稽臺恩而惟舊。

賜武康軍節度使韓琦口宣

卿識業夷通。謀謨高正。早參內密之近。比更方面之煩。器望益隆。誠績兼茂。曷升書殿之重。就增儀職之華。殿乃戎輪。崇茲朝範。爰效上駟之貢。式充內廐之羣。載閱勤恭。良深歎尚。

又

朕親郊修報。升燎告成。覃惠臣工。均釐藩岳。卿居傑望。濟以忠圖。方倚幹垣。用優名數。進崇塔而馭貴。疏多邑以昭庸。馳命輶車。往頒命綽。惟茲茂渥。宜卽欽祗。

又

卿風致高飭。識寓宏通。宜翼藩朝。明暢文武。外易戎輪之重。就升師鉞之雄。乃瞻在茲。僉言允若。爰貢上駟。來賓內閑。益亮誠勤。彌欽意尚。

賜新除觀文殿學士知河陽富弼對友金帶鞍轡馬口宣

卿忠惟許國。任屬陪京。書殿升聯。地官適貳。式將眷倚。往致匪頒。

賜除富弼起復禮部尙書同中書門下平章事昭文館大學士赴闕啟書

卿大名宰國。宏業熙朝。遠略有開。高謨未究。遭艱去位。銜恤在家。上鉉曠才。冢卿缺職。永惟在疚。亦已累旬。涼瑣虛懷。蒼黔待起。朝有舊制。國念前徽。須伸權奪之文。庸副仰成之意。庭有孚號。物無異言。義固掩恩。忠本移孝。勉思美業。就成茂功。尙抑餘哀。來慰勳佇。

賜宰臣富弼生日禮物口宣

象炳中階。業隆上鉉。維申誕日。行夏紀時。俾孚子舍之良。奉若家庭之賜。式增榮觀。當體寵恩。

又

挺生時傑。光輔本朝。譽乃首春。慶惟誕日。爰舉優賢之典。用頒加惠之恩。侑族宴以是宜。寵台司而斯在。

又

元傑稟氣。英瑋誕才。若時奮庸。代工變化。三元首序。六射在辰。國有賁恩。家榮宴喜。餽奉將禮。醪酒侑懽。舉是寵章。體茲渥眷。

又

吐符喬岳。居守阿衡。建杓于寅。設弧在旦。眷言彝典。尊禮冢司。有醪酒之頒。兼餽奉之錫。助家庭之爲壽。廣姻族之合懽。慶賜是將。祇受惟允。

賜忠武軍節度使知永興軍文彥博口宣

鼎以九里之祀。陟配天丘。三朝之元。會同王歲。宗公先郊類之澤。羣岳有朝慶之文。卿業著蕭規。地崇陝

殉。舉禮祀而爲勞。頒賞策而則當。爰及首正。茲惟獻節。竝效名駒之賁。莫非上駟之良。有美款誠。尤多歎賜。

賜河陽三城節度使檢校太師同中書門下平章事文彥博生日進馬口宣

卿辰象粹精。台衡俊舊。疊緣誕日。申舉賚恩。命仲氏以奉將。助家庭之式宴。仰惟彝範。煩有奏函。爰馳上駟之良。來實內閣之祕。恭勸斯至。嘉尚弗忘。

賜保平軍節度使檢校太師同中書門下平章事判大名府文彥博生日禮物詔

公台舊德。俊哲大臣。適居主簿之司。爰屬設弧之旦。俾將慶賜。命遣使人。當體寵加。所宜祇受。

賜新授龍圖閣直學士張昇口宣

卿體行直清。才局明劭。政爲邊最。譽浹朝端。升委強藩。就遷禁職。爰賁簪雲之駿。來舒就日之誠。有美勳斯。良用嘉尚。

賜參知政事張昇上表乞致仕不允批答

夫年之貴于天下。德之先于人倫。尙矣。況乞言憲老。存諸典刑。國政任人。寄在耆哲。至于進退。豈局于彝制哉。卿老成司直。清忠篤行。閱古今之義理。歷內外之事任。蔚有風采。稔聞謀猷。憑賴忠規。參毗政道。雖年遠云及。而志力尙全。何遽挾章。乃欲謝事。是未亮眷倚之意。而自取宴安之適。使朕何望焉。

賜參知政事張昇上第二表乞致仕不允批答

夫治朝柄任。豈局以年。良臣忠規。不遺其力。卿蔚爲俊老。翼于沖人。黃髮無愆。清德有素。雖年塗云及。而志力不衰。陟恪肆勤。精明暢理。方陪大政。適倚老謀。比閱奏于公車。願還事于宰旅。已嘗批諭。猶此控陳。是未炤委成之懷。而自圖安佚之利。雖佳知止。難從恬退。

賜參知政事梁適生日禮物口宣

體資上節。地亞中階。自參翊以宜謨。號通明而任職。屬開秋之統序。協誕日之吐符。朝有奪恩。禮優近弼。爰舉匪頒之式。用將眷倚之懷。俾洽宴私。且昭榮遇。

賜定國軍節度使知太原府梁適口宣

省所進奉端午馬二匹事。卿利建高牙。倚臨雄關。爰遵浴蘭之節。來效簪雲之良。姑美勤恭。尤增嘉尚。賜彰信軍節度使判成德軍李昭亮敕書

地濱北落。月旅西成。沖氣薦和。下滋于寶稼。靈苗合穗。交蔭于綺陸。昭萬寶之順成。示三登之長祿。卿兼榮麾鉞。長治戎輪。覩擢穎于遐疆。喜同符于異畝。倅圖來上。列牘以聞。將順在茲。欽歎曷已。

賜彰信軍節度使新授同中書門下平章事判大名府李昭亮赴關茶藥口宣

卿召言侯藩。入覲王所。歷嚴途之阻越。諒旅從之勤劬。爰舉匪頒。以將眷勞。

又

卿外自國藩。入修王覲。歷悠長之官道。冒嚴厲之時寒。言念勤斯。固應勞止。爰伸迎賁。用示眷恩。

賜新除昭德軍節度使同中書門下平章事充景靈宮使李昭亮赴闕敕書

卿參中階之象。帥北落之師。煩我老成。亦已久次。方升庸于旌鎮。命總職于琳庭。亟奉介圭。促祇召節。

賜馬軍副都指揮使淮康軍節度使張茂實赴闕茶藥口宣

卿遠從旌鎮。入衛巖除。廣莫風高。嘉平臘近。特頒良劑。用示寵恩。

又

卿召言歸國。緬想遵途。屬此凝寒。勞于遐薄。式將奩賜。庸示臺恩。

賜相州觀察使知邢州劉從廣赴闕茶藥口宣

敕從廣。合符去郡。效駕還臺。冒闌暑以甚勤。歷脩程而良苦。式頒珍劑。用洽寵私。

又

卿載馳藩節。近次都畿。佇延矚之有初。諒興居之無爽。用頒饌禮。式洽恩私。

又

卿言趨觀闕。適次郊衢。瞻受玉之有初。諒據鞍之匪易。用頒良劑。式示寵私。

賜侍衛親軍步軍副都指揮使涇州觀察使定州路駐泊副都署王凱赴闕茶藥口宣

卿總治師干。輯寧邊鄙。特降璽書之召。用頒藥劑之良。以表眷存。所宜祇奉。

又

卿肅奉更書還司衛職初無辦嚴之日〔案〕後漢書吳漢傳嚴卽裝也師避明帝諱故改之卽引道此制初
訛引用全句原本辦良深跋履之勞飲劑所頒恩禮斯在

文恭集卷二十六

內制

賜福建路轉運使秦玠平江西賊敕書

邇者盜興江西。勢接閩嶺。延入爾部。驚騷吾民。汝善布教條。能設方略。協比州將。帥厲兵官。開募勇夫。剪戮姦黨。兇渠遂殄。生聚以安。使指告還。章封言狀。眷茲勤略。良可嘉焉。

賜提點刑獄施元長平江西賊敕書

汝早稱才名。外提憲寄。日者他盜侵于本部。勢頗屯結。衆甚繹騷。而能躬履險難。星言馳赴。奮厲衆力。開募短兵。剪戮兇渠。離散支黨。屬城以肅。外臺上言。協奏勤庸。甫知明略。有懷謙默。益用歎嘉。

賜知汀州藍丞平江西賊敕書

日者逋寇弄兵江西。小驚朕師。逸入比境。汝捍固本土。協議外臺。開募短兵。帥厲衆力。休有方略。訖致殄平。爾勞居多。使者言狀。有懷忠力。良切嘉焉。

賜京東路轉運使董沔殺散河北賊敕書

敕董沔省龐籍奏河北過來軍賊兇勢不小齊州兵甲殺敗後若不急行翦除或散入鄉村卽復爲民患汝尋披帶兵士徑往兗齊二州往來催督諸頭下兵甲接續殺獲事汝強濟有聞廉清自勉夙將漕節受任外臺而齊魯之疆濱接膠土濱池斯在姦盜是依屯結其中寇攘爲患擿發陰伏伺知起居親糾合于環兵廣設施于明略翦除支黨清定部封吏息追胥之煩民去驚駭之患茲惠孔碩厥庸爲多東藩帥臣刻章言狀有嘉勳懋良深歎矚

賜判大理寺郭申錫及審刑詳議官等敕書

敕郭申錫等省權知審刑院事張揆奏據大理寺日奏司申十月十六日以前送下公案茲已斷奏了畢無見在事外郡請讞繫囚待報況茲寒苦朕甚閱焉汝等法術通深才資開敏平亭疑奏附致比例咸適削成之愼而無几案之留有副欽矜良增嘉尚故茲獎諭想宜知悉

又

羣氓多辟庶獄滋豐用存疑讞之科以廣平反之施爰書來上累牘實繁汝等持法甚平以文無害究研惟允操決靡留遂停丹筆之書盡釋黃沙之繫適當歆毒良副哀矜爰覽奏陳尤多嘉尚

又

國家刑典用中獄疑許讞決平寄于列寺審克存于禁局相爲表裏參適重輕用愼例成庶無壅滯汝悉心處當持議詳明論報弗留開敏可尙閱茲奏述深于歎嘉

賜權判大理寺陳太素等敕書

朕日見羣臣親覽庶政惟諫官論事法官奏讞雖復旰食猶爲之論決所以者何防壅蔽而慮留獄也汝等竝以一時之選典茲三尺之法能以明慎敏于弊斷鞠書隨傳列牘告殫益彰宿業之勤良副欽刑之寄永言嘉尚弗忘于懷

賜權大理少卿王惟熙等敕書

昔林光斷獄歲止三四貞觀大辟裁二十九嗚呼何施而臻此乎朕道化未孚刑禁且衆鞠書比上請讞亦繁汝善體哀矜敏于弊斷不使留獄頗副欽刑言念恪勤弗忘嘉歎

又

夫刑罰之于化民未矣然至治之世不能去刑朕燭理未明躬化猶爽鞠書狎至治讞尙繁汝等善體哀矜良勤弊斷丹筆無滯几案爲空爰覽削陳弗忘嘉歎

賜皇兄寧國軍節度使同中書門下平章事同知大宗正事北海郡王允弼敕書

卿任隆藩翰地處親賢參耀台文董司宗牒克諧公族允穆朝言近以宗說等瀆于人倫陷此邦憲迹惟可醜理莫得容卿首秉宗司乃同官守骨肉薄罪乃養于私恩名教大防難隱于公議深惟舉白良合糾虔屢上奏封具昭謙畏誠防閑之不逮匪訓導之有愆當體眷懷勿煩敷述

賜平江軍節度使兼侍中知大宗正事允讓敕書

卿藩國表儀。宗室賢亮。體行明潔。器範端修。資六德之夙成。賴九宗之治正。本支以睦。譽望孔昭。近以公族之中。愆于至行。弗率乃教。自陷匪彝。猶以家情。屈于邦憲。茲固愚鄙之稟。所謂不移。殆非訓導之方。有所未至。何用防嫌而上奏章。求解大宗之司。殊乖尙德之寄。當念燕貽之重。姑懷愼敎之仁。懋勉居諸。益勵來者。

賜起復雲慶將軍濟州防禦使王仁敕書

卿制邊部之雄。控大鹵之重。比因朝慶。且拜臺恩。遠傾就日之誠。來效簪雲之駿。有彰勤叩。良用歎嘉。賜新授憲州防禦使劉渙敕書

汝以沈敏之才。得摛循之術。擢升軍禦。董治戎昭。亦緣端始之辰。併有效牽之貢。載懷勤叩。良用歎嘉。賜撫州刺州滄州鈐轄董貴敕書

汝遙剖左符。出鈐尺籍。遶茲景至。欽乃燎熏。能竭寅恭。交修貢助。彌昭誠恪。良用歎嘉。賜侍衛親軍步軍都虞侯王從政敕書

又

汝參司親衛。出護邊兵。遶乃升陽。會茲報貺。修其貢助。奉此效牽。有加勤恭。良深歎囑。汝世濟勤勞。材推果壯。領巖除之禁衛。升侯奄之榮名。尙委強藩。實繫忠力。爰輸上駟。來實外閑。載詒款勳。良增嘉尙。

賜鳳州團練使高順等敕書

汝出總戎輪內參親衛。力于經武。志在輸忠。爰因端節之良。乃選上駟之駿。效率闕下。底貫中。載開閱勦。勦尤增嘉尙。

賜知建昌軍曹觀敕書

汝職在勸農。土惟宜殷。修列郡經常之貢。省大官導擇之勞。言念效勦。良增嘉尙。

賜原州刺史知涇州安俊敕書

三朝受籍。萬玉在庭。汝擁衛邊隅。拱懷朝次。效名駒于龍友。實華殿于臺泉。眷茲虔恭。弗忘嘉尙。

賜海州團練使史吉敕書

汝肅綰戎圖。分持軍簿。並緣任子。來貢維駒。慶賞所延。勤誠可尙。

賜潭州通判李丕緒等修子城敕書

敕李丕緒。省知潭州任顯。奏汝郡大提舉。管勾修築子城。用甃甃砌。並得完備事。汝受任湘中。服勞官下。志存經遠。慮及居安。能協守官。率和旅力。增完城壁。就濬池隍。悅使有宜。樂成無射。條聞來上。嘉歎良多。

賜新除資政殿大學士吳育對衣金帶牽轡馬口宣

卿籍起洛臺。詔藩陝服。偉名增職。左右陪卿。庸示眷毗。就頒錫舉。

賜觀文殿學士田況乞致仕不允批答

卿素秉忠規。早司樞筦。經營百物。通知四夷。鼎以愆和。久茲移疾。交章求解。批諭弗從。尋亮至誠。姑授閒職。庶熙神于事外。得味道于環中。就乃平康。副茲眷矜。何乃遂求挂冕。荐貢奏函。卿雖身災所嬰。而年塗未艾。宜息煩慮。更謁善醫。及此暄辰。早復常膳。

賜參知政事王堯臣生日禮物口宣

才具之美。高映時髦。識業之明。坐陪國論。屬此仲商之序。協于誕日之良。舉是朝恩。助茲族宴。抑乃匪頒之式。體予眷賚之私。

賜新授右諫議大夫皇甫泌口宣

卿稔服史文。兼資識致。擢升諫列。移領藩條。爰擇上駟之良。來奉內閑之貢。有懷勤叩。茲用欽嘉。

賜兵部員外郎知制誥吳奎知壽州口宣

省所進奉新茶芽事。具悉淮土上腴。園茗繁植。春英所掇。時品爲良。方貢是勤。嘉尙無已。

賜鎮潼軍節度觀察留後知鄆州李端懿口宣

省所進奉阿膠事。藥劑所須。膠品斯在。區產云記。阿井曰佳。卿守在藩條。述茲方貢。謹于熬治。協乃精良。足諒寅恭。誠增嘉尙。

賜新授禮部郎中充天章閣待制陳暘叔口宣

卿體業冲劬。器宇夷通。有意本朝。允宜內閣。乃眷北道。姑委要藩。爰貢良蹄。用嘉美志。

賜鎮安軍節度使判陳州程林口宣

曩以拜貺于郊。覃渥在位。而我王室之老。實殿輔邦之雄。賞策所班。朝範惟舊。俾爰子舍。往錫命書。卿出于忠純。篤爲誠節。選上駟之驥耳。實中廐之承華。載閱勤恭。彌深款尙。

賜鎮東軍節度觀察留後知潁州李端愿口宣

省所進奉端午馬一匹。具悉。卿總司留印。長治帥藩。爰因采艾之辰。乃效傾葵之志。獻之上駟。奉厥內閑。有嘉勤恭。弗忘款賜。

賜新授閣門使康德興口宣

汝歷護塞兵。見稱武幹。適重別都之委。用優上閣之遷。當勵忠規。以虔恩數。

賜河陽三城節度使檢校大師同中書門下平章事王德用口宣

卿地美忠門。位聯宰路。聞于兩社。夙兆于祥占。乘彼八鸞。適敷于惠化。爰因誕日。用示錫恩。俾爰似續之良。率乃匪頒之品。抑惟彝禮。遽閱奏函。選屈產之名駒。實承華之內廐。載惟款至。良切欽嘉。

賜五臺山十寺僧正順綰等敕書

省所進新正功德疏事。具悉。吉祥刹土。名勝伽藍。淨衆所棲。元正斯屆。大營蒲塞之饌。廣演貝多之文。用集妙因。來陳壽祝。勤恭彌顯。嘉尙良多。益在薰修。副茲嚴奉。

賜五臺山十寺僧知今等敕書

省所進新正功德疏到闕事具悉。汝等宴坐名山。安棲淨衆。鼎遭三朝之吉。來祈千福之祥。用嘉乃勤。且命以賜。茲乃前矩。厥惟彝恩。咨示薰修。體予崇奉。今賜知今等紫僧衣一對。絹二十疋。故茲獎諭。想宜知悉。

又

汝等薰修巖谷。宴坐道場。因王歲之紀。端奉梵文而歸福。有嘉精志。用錫顯恩。宜服圓乘。益勤勝業。

賜回西蕃樊州團練使霞展敕書

汝欽奉聲文。恪修誠志。遠效踰沙之貢。載從易地之遷。庸示茂恩。益圖忠款。

賜西蕃樊州團練使霞展男都君主霞智敕書

汝族高邊部。志拱諸華。載馳上駟之良。來奉內閑之貢。有嘉款到。特示頒宣。

賜交趾李曰尊敕書

卿忠存奕世。義戴本朝。善繼藩稱。能靖封守。朕博臨庶國。普愛羣氓。爰覽啓陳。用嘉恭順。

賜占城國王敕書

卿志慮深純。誠節款到。邈居溟漲之外。馳系闕庭之間。嗣守忠規。述修世職。遣茲使介。奉乃表章。越沃日之驚波。致旅庭之貢物。傾輸斯至。勤叩可嘉。用示眷懷。特蕃錫與。益思祇順。當體寵優。

賜占城國王俱舍利波徵收羅婆麻提楊卜敕書

省所差人進奉生象二頭。象牙二百二株。藥犀大小一百九十一株。下色紫礦一百九十一斤。中色煎香五百斤。下色煎香五百斤事。具悉。卿長治國藩。聿修王職。地雖居于遐外。世彌篤于恪忠。匪忘存闕之誠。來效占風之貢。俾爰使指。載越溟津。亟覽表章。深嘉誠節。式將乃眷之意。特推加惠之恩。賞體寵優。益思欽順。今回賜卿銀三千兩。錢一百貫。文至可領也。其差來蒲息。陔琶等到闕。各支賜對見朝辭衣物銀器衣著等。令于殿前都使衙安下。及差鴻臚少卿劉舜臣等。館伴令御廚翰林饌司往彼祗應酒食鋪陳。其所乞白馬。已支賜二匹。訖。故茲示諭。想宜知悉。秋涼。卿比平安好否。遣書指不多及。

賜夏國主進奉賀正馬驢口宣

王歲肇新。人正伊始。眷乃世藩之舊。主茲邦土之封。爰效忠規。聿修貢式。緬懷款至。良用款嘉。

賜夏國主生日禮物口宣

紹復前徽。述修貢職。素秋建始。良日誕彌。用示眷恩。式將慶賜。無忘朝寵。益濟世忠。

又

奕世資忠。承邦濟美。三朝開序。六射協辰。爰導壽祺。式將惠賜。益思恭德。庸對寵章。

賜回夏國主口宣

省所奏母薨訃告事。具悉。不圖閔凶。奄失慈怙。忽聞來訃。用但于懷。棄背以還。哀摧難處。惟當抑割。無致殞傷。撫念所深。喻言何既。

贈太師中書令貽永祭文

卿體行淑均。志慮忠篤。久毗內密。蔚爲老成。甫解繁機。俾究遐福。奄忽不憖。傷悼于懷。適及攢塗。裁致薄酌。餘哀所寄。明識當知。

贈太尉兼中書令濮王祭文

惟靈地居宗戚。德乃令王。遶于綿疴。奄然長逝。茲用惻悼。不忘于懷。卹典申加。攢塗暫闕。爰修奠酌。其鑒追哀。

又

早繇近戚。參賴敏材。領帥藩房。留治都局。年途雖晚。志力尙強。奄及云殂。初不聞疾。永言茲悼。有歎常懷。馳遣信臣。裁致薄酌。緬想營識。儻能歆斯。

又

籍在外屬。帥茲列藩。歷侍近嚴。比更煩委。適奉朝請。奄至喪亡。先遠有期。永懷無已。俾爰伸酌。冥識追哀。

文恭集卷二十七

內制

皇帝賀大遼太后生辰書

義重睦鄰。禮敦誕日。企徽慈之凝範。因慶育之履祥。爰命使輅。式將信幣。祝茲壽嘏。表乃誠忱。

賜契丹人使茶藥口宣

卿信函修睦。誕節講懷。載勤使隔之行。諒有夕冰之愼。用頒湯飲。式示眷懷。

又

卿對持瑞節。參奉信函。來慶誕辰。載涉長道。用頒飲劑。式表眷恩。

又

卿等對持節旄。遐涉疆亭。紹修誕日之愼。夙戒暄辰之御。有少賜物。用表至懷。

又

卿等奉將信節。馳慶誕辰。固多跋履之勞。用頒齊和之品。副之良茗。咸表眷恩。

又

卿陸鄰將命。誕節修懷。惟原隰之驅馳。有風塵之匱薄。俾爰往賁。用示眷恩。

又

卿式將赴告。載越阻脩。固多跋履之勞。宜厚撫存之眷。用頒良劑。以示至懷。

又

卿等對銜使指。交慶歲元。久冒寒凝。良勞跋履。式將賜物。庸表至懷。

又

卿奉將使指。載整華輶。惟匱薄於風寒。諒勤疲於原隰。就伸頒賚。庸助綏將。

又

卿參陪上介。並駕輶車。深惟跋履之勞。固積疲勤之思。往伸勞賜。用表眷存。

又

卿首銜使指。交慶王正。惟匱薄于盛寒。諒勤疲于脩陸。致茲賚物。昭乃眷恩。

又

卿信節副行。端辰入慶。登岐云邁。攬轡良勞。宜有匪頒。以昭眷囑。

又

卿蒞居使首。祗慶歲元。屬風霜之凜如。諒原隰之勤止。式將予賚。俾澤爾勞。

又

卿陪貳使華。講修鄰好。慶三元之嗣歲。歷百舍之在途。宜有賚焉。且嘉勤止。

又

卿等竝持國節。紹講鄰懷。勤勞累驛之程。匪薄餘寒之氣。式將賜物。用示眷懷。

又

卿對銜使命。紹講鄰懷。率旅從以來斯。冒脩塗而勤止。往伸賚物。用表眷恩。

又

卿等蒞爲使首。遙奉國函。來修誕節之懷。良苦長塗之涉。特伸頒賚。庸表眷懷。

又

卿陪貳使聯。講修鄰聘。爰得謁闕之告。用嘉馳驅之勤。往致匪頒。式昭眷勞。

又

卿蒞爲使首。聘茲歲端。載迂晨霧之行。諒有夕冰之慎。用頒良劑。以表至懷。

又

卿因三元之首。講二國之懷。率旅從之甚勤。冒祁寒而良苦。俾爰賜物。以示眷懷。

又

卿以二國之好，充備于使華。三朝之元，踐修于儀聘。載勤馳隔，仍冒凜冬。良劑所頒，冲餐斯在。

又

卿協恭使指，爰率于丞徒。奉聘歲元，式將于信幣。寒凝甚苦，匱薄良勞。茲用寵頒，以昭深眷。

恩州賜北使茶藥口宣

卿等來慶誕辰，適當維夏。駕乘駒而云邁，馳使隔以良勞。特示寵頒，用伸至眷。

又

卿等對將聘節，胥泊丞徒。來修誕日之歡，載涉迺疆之迺。特伸頒勞，用示寵嘉。

白溝驛撫問北使口宣

卿等張是使旌，講于權聘。來慶誕彌之吉，諒多匱薄之勤。用示眷慈，特頒宴賚。

白溝驛撫問北使兼賜御筵口宣

卿等嗣修鄰好，甫次溝封。載勤使隔之行，宜有詔筵之錫。用嘉冒涉，特示眷存。

又

卿等銜奉信辭，講修誕好。惟載馳于使乘，諒甫次于疆亭。用示眷慈，聿伸宴勞。

白溝驛撫問遺留人使兼賜御筵口宣

卿等式將遺意。爰奉訊函。次境舍以方初。駕輶車而良苦。宜伸宴勞。庸示眷懷。

雄州撫問遺留人使口宜

卿等奉將末命。來致遺儀。馳原隔以良勞。次溝封而云始。用伸撫諭。宜體眷存。

雄州撫問北使口宜

卿等言冒脩程。來尋舊好。且以嗣君之慶。續茲與國之懷。緬念勤疲。用伸撫諭。

又

卿等對銜君命。聯飾使轡。惟境上之甫臨。計道中之良苦。俾爰勞問。示乃眷私。

又

卿等交慶歲元。甫臨境首。顧寒凝之方盛。在跋履之良勞。用撫乃誠。式將予眷。

又

卿等交修鄰好。胥慶歲元。適冒寒塗。良煩旅從。有嘉勤篤。特示眷存。

又

卿等被選使華。務修邦聘。涉溝封而伊始。戒徒御而甚勤。特示撫綏。用伸眷屬。

北京賜北使御筵口宜

卿等肅將君命。祇講鄰懷。顧旅從之寔繁。屬祁寒之斯盛。用伸宴賜。式示眷綏。

又

卿等踐修篤好。馳冒遐塗。爰偕旅從之行。適次別都之近。用嘉勞止。是錫燕胥。

又

卿等慶茲誕節。奉乃聘儀。來修與國之懷。適次別京之近。爰伸燕勞。用表眷懷。

又

卿等載馳使隔。爰講鄰懷。眷懷邁以勤斯。諒脩程之勞止。就仲詔撫。庸示宴慈。

班荆館賜北使赴關御筵口宣

卿等肅將君命。俯次都門。跋履良勞。敏勤可尙。特頒宴惠。用示眷懷。

又

卿等銜命新君。駕言遠道。來奉纂承之告。諒多跋履之艱。適次近亭。用伸勞宴。

班荆館賜北使到關酒果口宣

卿等睦隣持聘。嗣歲講懷。飭車馭以良勞。次國門而伊邇。用頒勞賜。式示寵恩。

又

卿等紹修鄰好。交慶歲元。如聞使乘之馳。已次都門之近。式將予賜。庸勞乃勩。

又

卿等奉聘講懷。祝延修慶。載馳使隰。近次都門。爰命寵頒。式昭渥眷。

又

卿等載脂使乘。言屆都門。講懷聘以惟勤。中宴慈而既渥。用嘉行邁。式示眷優。

又

卿等踐修時好。聯慶歲元。俯次近鄣。良勤長關。標醪甘實。用寵示恩。

又

卿等預選使華。交修懷聘。惟嚴途之載涉。諒旅從之甚勤。用均御府之甘。以勞輶車之恪。式昭眷寵。宜在祇欽。

又

卿等奉將遺指。言次近鄰。爰屬炎辰。載勤遐路。宜伸勞賜。以表眷恩。

就驛賜北使內酒果口宣

卿等久馳使隰。甫憩都郵。惟按轡之良勞。且解裝之方適。用頒甘品。式示寵懷。

又

卿等使旌來聘。里館載寧。用頒膚寸之醪。兼錫上腴之果。侑茲宴勞。體乃眷恩。

又

卿等講修誕慶。協比使華。冒暄溽以良勤。宜偃休之爲適。特伸頒賚。用示眷嘉。

又

卿等使指遙衝。歲元交慶。爰錫甘腴之品。仍頒醇旨之醪。以侑樂胥。當欽眷寵。

就驛賜北使生餼口宜

卿等將命乘輅。告言纂服。涉疆亭而惟邈。授里館以云初。勞至有儀。所頒非腴。

又

卿等對銜君命。胥慶王正。爰當定館之初。用舉饋牢之舊。頒茲餼禮。表乃眷恩。

就驛賜北使銀沙蠟唾孟等口宜

卿等奉若信函。慶茲獻節。解裝伊始。授館有初。爰命頒恩。以昭眷待。

又

卿等震誕修懷。遠華將命。言念乘輅之久。屬當授館之初。特示寵優。用伸頒錫。

又

卿等使乘聯華。慶函講好。求祝延于誕節。方休舍于都郵。爰命寵頒。式將渥眷。

又

卿等來慶誕辰。載馳長道。在勤勞而可尙。屬休舍之有初。用示恩頒。以昭眷寵。

就驛賜北使春幡勝春盤等口宣

卿等慶屬歲元。紹修邦好。嘉逢春節之立。喜見年芳之新。用示眷恩。式昭禮意。

玉津園賜北使弓箭御筵口宣

卿等來修邦好。方舍都郵。聊折俎以致懷。命司弓而延射。用伸宴勞。式表眷恩。

正月一日北使入賀畢歸驛賜御筵口宣

卿等受言君所。講好王正。方從里館之寧。且示詔筵之賜。用伸勞飲。式表需恩。

又

卿等奉將使節。來慶王春。展聘幣以成儀。頒詔筵而示惠。用昭乃眷。于以勞動。

又

卿等來慶歲元。奉修邦好。爰卽安于都舍。乃就錫于詔筵。用洽懷愉。當知眷寵。

正月一日北使入賀畢就驛賜花酒果口宣

卿等銜指嗣君。繼好先日。來赴惟新之慶。爰屬履端之元。申命寵頒。式將渥眚。

又

卿等通懷二國。修慶三朝。爰因休舍之辰。載錫甘醇之品。用嘉惠好。當體寵恩。

又

卿等使車將命。王歲通懽。授館有初。解裝少憩。宜伸惠賜。以表眷懷。

又

卿等式將好幣。已達訊函。方退息于都郵。宜就頒于良醢。副之甘實。體我眷恩。

正月二日北使就驛賜宴花果口宜

卿等持聘已成。履元伊始。久驅馳于華隔。適休舍于都郵。芳翠甘醇。式將眷賜。

契丹賀乾元節人使朝辭訖就驛賜酒果口宜

卿等夙持鄰聘。申慶誕辰。嘉成禮之有儀。在眷懷而增厚。宜頒優賚。式示寵章。

賜北使朝辭訖歸驛御筵口宜

卿等慶屬歲元。寅修鄰聘。訖奉報書之禮。還脂使乘之行。用錫宴慈。式將眷寵。

又

卿等奉聘訖儀。駕言復命。將載脂于歸轍。爰用錫于詔筵。渥眷是將。言還斯在。

又

卿等王歲修懽。使華成禮。已入辭于宸陛。命就宴于都郵。用示眷慈。式敷驛好。

又

卿等奉聘成儀。駕言復命。率丞徒而嚴邁。詔祖轍以寵行。且有頒宜。以伸眷待。

又

卿等與國修睦。誕辰畢禮。將復乘輅之命。用頒折俎之恩。俾洽宴胥。式將眷屬。

又

卿等竝緣誕節。來講至懽。會訖邦儀。言旋使乘。用頒宴勞。式厚眷懷。

班荆館賜卻迴北使御筵口宣

卿等展成信幣。還駕使車。用勤祖輟之行。特舉詔筵之餞。以將惠好。當體寵私。

又

卿等擁節交懽。稱觴究禮。屬言旋于使乘。用伸餞于詔筵。且寵成勤。式昭異眷。

又

卿等持聘訖儀。駕言復命。飭使裝而告邁。伸祖輟以寵行。用嘉爾勞。式予眷賚。

又

卿等將命講懽。駕言迴馭。爰卽近郊之館。命修載輟之儀。式啟燕胥。以伸眷勞。

又

卿等訖奉函題。還脂輅乘。出次長亭之近。眷言旅從之行。就錫甘醇。用昭寵渥。

又

卿等展幣成儀。還轅復命。近郵云餞。轅輟且行。宜示頒恩。以將渥眷。

北京賜卻迴北使御筵口宣

卿等肅將時幣。交慶春元。飭歸馭以載馳。次別都而伊始。用伸宴勞。當體眷恩。

又

卿等爰敘聘圭。載脂歸轍。眷別都之云屆。在旅從之良勤。特示勞還。用伸詔餞。

又

卿等誕節講儀。使華成命。言脂車轡。載涉川疆。用錫詔筵。以勤還馭。

又

卿等震誕修權。旅歸致命。竝馳使牡。戾止別京。特示宴胥。用伸眷寵。

雄州賜卻迴北使御筵口宣

卿等展成聘幣。促駕歸轅。載惟原牡之馳。俯屬疆亭之次。特伸詔餞。以洽寵恩。

賜北使迴至瀛州御筵口宣

卿等修好成儀。駕言復命。適屬歆炎之候。諒多履跋之勞。爰錫宴慈。用伸眷渥。

又

卿等惟新稱嗣。來赴于纘承。載轡歸期。聿勤于駿邁。往頒慈宴。用示需恩。

又

卿等將命睦鄰。紹教于舊好。駕言歸國。載涉于脩岐。爰錫宴胥。用伸眷勞。

瀛州賜卻迺遺留人使御筵口宣

卿等被遺舊君。奉修遺好。冒至寒而歸國。率旅從以在塗。申厚燕胥。庸昭眷矚。

白溝驛賜卻迺北使御筵并撫問口宣

卿等爲壽誕辰。戒言歸國。歷疆亭而載邈。率旅從以良勞。特示宴慈。用昭寵餞。

文恭集卷二十八

帖子詞

皇帝閣春帖子

〔案〕本集諸帖子各有五言體此亦宜有之。殆爲傳寫缺佚。

三元鳳歷當春始。萬壽龍扈進御前。綵勝朱幡宜此日。金枝玉葉慶新年。
蒼玉新旂祀木神。今朝太皞始司春。農疆漸覺星辰正。壽歷長隨日月新。
翦綵房中新勝出。披香殿裏早春回。祥雲更傍南山起。來對君王萬壽杯。
苑中芳樹條風細。天上黃衢杲日遲。仙果定生千歲實。祥烟長護萬年枝。
春官青鳥司開啓。星舍蒼龍主發生。甘雨惠風資帝力。杏花蒲葉勸民耕。
玉殿香絲縈綵縷。金盆白雪間紅花。子孫千億無疆壽。盡逐東風入帝家。

皇后閣春帖子

羲仲司暘谷。塗山佐夏王。六宮師儉德。四海化躬桑。
中禁千祥集。東方萬象新。綵幡迎喜氣。寶字鏤宜春。

東陸韶光先四序。周南風化被羣芳。資生萬物昭坤德。嘉慶千春集紫房。
東風初入長春殿。碧溜新融太液池。社遠未當迎燕日。川晴先近浴蠶時。
白綠仙雲雜紫雲。長生靈氣護元君。已膺虎劍司陰教。更珮金璫奏寶文。

妃閣春帖子

日向陰虬永。春隨綵鳳歸。玉京多燕喜。金殿滿光輝。

宮中玉漏迎暹日。天上珠躔麗次星。軒頊聖圖光億載。皇英賢範奉千齡。
晉官始奏融風至。御水初傳曉凍開。寒漏催將仙臘盡。春旂飛入貴宮來。
翦綵平明出藝房。長生殿裏百花芳。書銜燕子青春早。劍拂仙衣白日長。

夫人閣春帖子

綵樹春芳滿。仙萸畫景長。早花依玉砌。初溜漾銀塘。
浴種宜蠶事。修禊盡燕祠。資生迎木正。蕃衍納春祺。
釀酒淳神水。延年飲露華。八風朝聖日。三境住仙家。

雪晴宮樹有新梅。來報東郊淑氣回。春令先從天上起。年芳初向日邊開。
迎氣青幡獵曉風。九門佳氣鬱葱葱。日華初在樽桑上。春色先歸御柳中。

皇帝閣端午帖子

兩極注生氣。晉官協夏鈞。良辰五日永。景福四時新。
曉霽澄天宇。離明敞帝閭。靈符千福集。神印百邪奔。
剛日逢端始。炎辰屬長贏。君王仁且聖。慈旨卻梟羹。
殿戶還闥入。宮池御水涼。綵舟人競渡。化國日偏長。
四時乘大德。五日敞金扉。陽暑移南陸。天光盛紫微。
商管徵陰動。良辰午正端。三光扶聖壽。億載奉皇歡。

三殿茲辰奉御觴。薰風梅雨好年光。炎天更作奇峯勢。
來表南山壽歷長。後宮駟鳥將雛樂。上苑安榴著子新。
嘉節已將天合數。明離還覩日重輪。南方炎帝本乘離。
長育羣生在此時。命縷綵花傳故事。風光天上更相宜。
南方朱鳥司時令。東闕蒼龍護禁扉。萬壽御觴端日舉。
祥風三殿繞雲旂。九霄嘉節重端辰。命縷靈符粲寶文。
虞舜無爲心自正。五絃琴上奏南薰。寶岐麥色黃雲重。
御苑榴花丹焰深。已顯豐年資帝力。更憑佳節悅天心。

皇后閣端午帖子

川館親蠶後。宮房獻繭初。香綰爭點畫。綵縷競垂舒。
棟葉迎新候。菖花發美祥。憂勤宣內則。嘉宴助時陽。

靈艾傳芳遠。仙萸吐葉新。配乾資厚德。介祉集嘉辰。
星火朱光熾。繒絲采物華。謹謠宜聖日。王氣協皇家。
紫禁端辰晝漏長。朱陵生氣盛南方。長秋此日司陰教。
壽觴百福融甘露。寶索千祥鏤彩雲。五日永逢佳令節。
香爐角黍傳三楚。丹篆靈符辟五兵。更有龜臺仙藥在。
靈苗遠採三山藥。仙篆高飛六甲符。此日萬神同翼衛。
蕤賓干氣盛炎方。坤德資生茂百昌。西域葡萄初蔓衍。
楚樓雕盤九子香。綵絲朱索更迎祥。坤元此日扶皇極。
偉兆先時協壽房。

夫人閣端午帖子

五絲通遺問。百草闢輪贏。神印能祛惡。靈符解辟兵。
天家饒物采。華節有光輝。明月裁歌扇。輕霞翦舞衣。
禁苑年光麗。端辰物象華。天風結桃實。火德盛榴花。
蓮葉抽芳際。榴房結子初。長年闢百草。舊俗祭三閭。
廣殿回雕輦。滄池漾綵舟。堯心順時令。不是重嬉遊。
魚龍曼衍夸宮戲。湘虛浮沈銜水嬉。齊上聖皇千萬壽。
飄然仙樂在瑤池。

故事順時羞角黍。舊儀乘節浴蘭湯。人間涼麥欣時豫。天上薰風愛日長。
續命由來宜綵縷。辟邪相向佩靈符。夏鈞調樂長生酒。歲歲宮中祝聖圖。
宮中應節垂金鏤。天上迎祥捧玉卮。更奏開元羽衣曲。年年長願侍瑤池。
彩艾相傳禳故氣。香茅競愛結靈芳。炎洲正覺仙遊盛。化國偏知日景長。

上梁文

醴泉觀涵清殿上梁文

兒郎偉。國家出神明之後。濬發靈源。受天人之歸。勃興炎歷。軼夏商而拓迹。介河洛以造邦。混并八紘。傳
序四葉。皇帝紹祖功宗德之烈。躬神武聖文之姿。大明燭于六幽。至仁孚于羣品。運陶甄而範俗。丕變中
和。偃戈革以靖民。洽臻昭泰。大秩百神之祀。上躋三靈之休。天瑞格思。坤珍至止。眷言京室。粵在巽隅。有
龜蛇合體之精。顯水土北方之異。蟠居息壤。悠湧榮泉。色華清以蕩邪。味甘飴而蠲疾。祥開神隲。惠洽都
人。有悅宸心。爰稽瑞牒。卽其爽塏。峙厥靈祠。嚴香火之薰修。極規模之壯麗。鬱攸勿戒。豈冥數之有常。建
章乃營。在舊文而可作。集班倕之巧匠。飭荆楚之新材。攷工程館。庶民獻力。天老練其日策。石申候其星
經。抗華殿以正基。架修梁而結宇。雄虹晨挂。采翟朝飛。聳層構以凌雲。成新宮于不日。道旁盛于輿馬。觀
者同于堵牆。飫賜之豐。既覃于微阜。躋謠之美。敢采于游童。且慶落成。用陳善祝。

兒郎偉。拋梁東。石橋觀日任施功。三韓百濟歸封內。方丈蓬萊在日中。
兒郎偉。綴梁西。青雲可上不須梯。雪山葱嶺人無外。宛馬蒲桃路不迷。
兒郎偉。拋梁南。赫赫王靈海外覃。薰風養物深仁被。鯁壑無波至德涵。
兒郎偉。拋梁北。天子威靈操斗極。單于攬酒奉驩盟。潢水占風朝有德。
兒郎偉。拋梁上。路近銀河翻碧浪。陽鳥戢翼過猶疑。金雀栖觚鎖相向。
兒郎偉。拋梁下。鬱鬱祥氛徧朝野。九龍于此護靈泉。六甲相將扶大廈。
伏願拋梁以後。帝圖益大。天歷彌長。區宇嘉靖。歲物蕃昌。乾剛增九五之吉。本支茂千億之祥。惟威神之
館御。佑鼎祚以無疆。

集禧觀大殿上梁文

兒郎偉。我國家席真祖之慶源。受上穹之駿命。誕膺炎歷。昭啓黃圖。設都河洛之間。廣朝萬寓。建號房心
之次。大撫八紘。威稜震于鬼方。聲文燁于海裔。訖惟人面之類。達于王土之濱。莫不重九譯以來庭。執萬
珍而入貢。奉昭華之玉琯。獻弱水之神香。如衆星之拱北辰。若百川之赴巨海。三代土疆之制。悉統京師。
五岳神靈之祠。並居封域。欽屬先真之聖。尊加帝者之居。爰就國陽。載嚴館御。奉真游而惟永。歷年祀以
彌長。皇帝上聖難名。至人冠古。纂睿圖于三后。接遐武于九皇。仁厚之風。誕孚于億聖。齊明之志。昭達于
萬神。謹聖志以奉先。穆淵衷而居上。欽山岳崇高之祀。勤歲時朝謁之誠。徐御乾龍。疑瞻睟像。爰攷斯干

之制。載新大壯之模。選文梓之偉才。卽坤靈之寶勢。千章工度。庶民子來。詔郅手而督繩。命日官而推策。駕修梁之百丈。引建木之千尋。歡聲沸于皇衢。喜氣浮于絳闕。輒采輿人之頌。以廣游童之謠。

兒郎偉。拋梁東。三韓鼓舞樂華風。扶桑海樹朝暎上。方丈仙山瑞霧通。

兒郎偉。拋梁西。觚稜迢遞與雲齊。海中渤澥還驚淺。天外崑崙更覺低。

兒郎偉。拋梁南。萬壽山光滴嫩嵐。伏波銅柱王靈遠。虞舜薰琴帝澤覃。

兒郎偉。拋梁北。天子聲明通斗極。日南朝貢識天光。塞外耕蠶知帝力。

兒郎偉。拋梁上。日月星辰近相向。雲中僊語近還聞。天上銀河明可望。

兒郎偉。拋梁下。鬱鬱祥煙浮碧瓦。柔桑蔽日徧羣方。多稼如雲平九野。

伏願上梁之後。邦基鞏固。天業暉昌。元元躋于富壽。日日擁于休祥。少海重潤。前星載光。惟鼎祚之云遠。與嶽鎮而無疆。

修蓋睦親宅吳王院神御堂上梁文

兒郎偉。我國家眞祖開先。靈基憑厚。太微正氣。上稟于列精。臨代寶符。早恢于王略。惟天眷命。弈世多神。乘火勃興。紹乾闡繹。祖功宗德。造統業于億年。武略文昭。茂本支于百世。今皇帝至仁溥博。上聖登閔。利澤浸于懷生。文告柔于異類。極三光之均照。逮九譯之所通。莫不賓從。悉蒙覆冒。惇敍唐堯之族。展睦宗周之親。大列宅于京師。廣析藩于茅瑞。踰郇滕之啓胙。厚魯衛之建封。時乃維城。請營原廟。圖奉烝嘗之

薦申懷霜露之恩。勉從郡邸之章。特置諸儒之議。曰咨大匠。往飭衆材。攷北拱之極星。順方中之營室。裁茲崇址。詔厥清臺。練日策以維良。瞻霄衢之云霽。大鳴鼙鼓。上架脩梁。治建木之千尋。引長虹之百尺。盈車載酒。有肉如陵。賜上林之錢。茲焉山積。頒織室之錦。爛爾霞鮮。工徒悅使以忘勞。人士縱觀而竊歎。仰天子烝烝之孝。美公侯振振之風。克成壯棟之規。永保縣瓜之祚。式揚駿烈。用紀聖猷。

兒郎偉。拋梁東。秋霽三山氣象通。近窺日觀升雲白。平瞰天池浴日紅。

兒郎偉。拋梁西。蔥雪聲文萬國齊。昭華玉琯今仍獻。注水龍媒日更嘶。

兒郎偉。拋梁南。重譯來朝美化覃。越裳獻雉昭無外。江鬱捐珠示不貪。

兒郎偉。拋梁北。戴斗通驩懷以德。偃兵武庫表王靈。躋俗華胥資帝力。

兒郎偉。拋梁上。鬱鬱蔥蔥扶大壯。喬雲雕竊互呈鮮。合璧連珠近相向。

兒郎偉。拋梁下。華黍有秋盈綠野。湯孳飛走洽深仁。堯壤謳歌被純嘏。

伏願拋梁以後。聖圖日熾。宸算天長。導迎善氣。感育少陽。璇源邈遠。玉榦彌強。天休滋至。地寶蕃昌。惟免

焉之粗構。等歸若之靈光。

文恭集卷二十九

策問

御試賢良王彰夏噩策題

皇帝若曰。朕纘祖宗之洪業。撫區夏之重器。臨政思治。于茲三紀。何嘗不中夕惕厲。昧旦丕顯。延訪茂士。詢求讜言。冀臻治平。以垂永久。子大夫哀然充賦。咸造在庭。得不欲摠發智蘊。開沃朕心耶。方今庶務小康。至化猶鬱。兵戎雖戢。饋餉頗勞。學校雖興。禮讓殊鮮。官冗而浮食者衆。民疲而失職者多。陰陽爽和。眚沴間作。經瀆弛于常道。淫雨溢于舊防。賦調尙繁。昏墊靡息。豈朕明有未燭。德有未孚。致咎之來。在予爲懼。自昔繼體守文之君。承前聖之烈。藉累世之資。致園空之隆。騰頌聲之美。惟建武中興。亟修文德。貞觀特起。驟致太平。豈天時之協符。將人事之胥濟。功業遲疾。奚其不同。側席永懷。望古盈愧。夫聖王之制世也。必本于仁義之統。師道德之說。飭以儒雅。頒其教令。尋孝宣之治。尙于刑名。迹顯宗之政。本于理法。當二后之際。信賞必罰。刑清國富。鳳凰屢下于郡國。神雀比集于京師。致茲美祥。繫何然哉。今公卿大夫。與朕總方略。美風俗。而吏治未甚淳。民德未甚厚。豪右踰制。姦猾冒禁。以至守宰之任。循良罕劭。廚傳移于

使客。徭役迫于下。貧。殆有愁嘆之聲。未弭鬱堙之氣。豈躬行之弗類。而圖治之匪章歟。昔晁錯舉于賢良。公孫對以文學。深陳政道。竝先術數。仲父治國之器。內史詔王之柄。咸垂格訓。當安設施。至于春秋之稱一元。洪範之推九類。何行而正其本。何施而建其極。子大夫習先聖之術。熟當世之務。識古今王事之體。究天人精祲之原。所以蕩穢致祥。革弊興利。受策應問。咸以正對。毋諱有司。稱朕詳延之指焉。

御試武舉策題

皇帝若曰。夫威武者。文德之輔功也。雖復至治。疇能去兵。比詔有司。圖講常武。博延方略之士。參閱材技之能。冀崇善經。以馭長轡。子大夫曉習兵策。賁然造庭。質于前聞。佇乃明辯。夫兵本于仁義。戰畜于慈愛。而曰詭道。危事。何耶。邦國之法。雖曰制軍。而詰禁。帝王之兵。曷云以全而取勝。司馬之體。閱廊謂何。霸者之師。節制安在。昔晉侯之伐秦也。誰氏知其有功。楚子之救鄭也。何人料其必敗。兵法貴拙速。而譏巧久。若然。則亞夫失破吳之策。充國無制羌之功也。小堅大敵之禽。什圍倍戰之法。曹公官渡之克。何關于衆寡。晉文城濮之戰。試言于奇正。直入武庫。策本孰施。先趨北山。法何以勝。朕嘗讀良史之傳。疑各將之功。以孫武子之才。僅能入郢。有樂毅之略。不卽下齊。豈乏奇謀。諒有深旨。前代車戰。其來尙矣。後世以武剛而自衛。以偏箱而致討。或行則載于戈甲。止則爲于營陣。宜條利害。若爲設施。悉心以陳。朕將親覽。

試南省進士策題

問天道陰陽。實通政事。王者生殺。宜循時令。自秦任法理。漢尙經術。太初推歷。甫用夏正。故事報囚。必盡

冬月乃著經常之制。初無淹繫之煩。建武中興。率遵舊典。元和下詔。始改孟冬。議者頗贊其然。通儒復譏其否。執助陽順生之論。持議獄緩死之說。咸有經據。著明言之。國家道粹前王。刑乎中典。炎歷斯握。則與漢同。丹筆所論。尙仍唐舊。姑欲順三微之用事。去四時之行刑。凡當大辟之科。悉限季冬之斷。用遵卦氣。以攷天心。然而積習生長。更張慎始。固懼明識。雅富多聞。幸商推于古今。願詳陳于義理。

問、國家謹四夷之守。飭三邊之備。百萬之衆。領在將屯。什一之租。廢于支計。居常餉道。仰糴富賈。凡入粟于塞下。例受錢于都內。贏息莫計。乾沒無涯。歲或不登。人且勞止。道塗有捐瘠之歎。郡邑煩振業之方。深惟從權。規欲濟事。攷諸周典。甫侯有贖刑之法。稽于漢世。晁錯有免罪之策。所以厚民收怒。實邊弭患。且欲詳按舊制。闊略輕科。自非犯盜殺人。受賕撓法之類。理不得捨。意在必誅。餘竝差次免刑之條。申明入穀之贖。以實邊境。以防災潦。雖復失之有罪。不猶賢于賦民。勗思張敞之言。留省望之之議。條陳利病。開示話言。

問、八卦繇策而起。九疇以數而興。河洛之書。相爲表裏。天人之際。莫不該貫。固以究性命之韞。著禍福之效。包括三極。陰陽下民者也。何則。輔嗣解易。孔氏釋書。六爻文辭。止明人事。五種性行。專推王者。迨至上經下經。離爲二說。五福六極。合爲九類。斯文若此。其義安適。申尋前世。博存衆業。京氏之術。列于學官。夏侯之經。治于博士。咸以儒者。明于天道。前賢多習。舊史具存。厥後蔑然。其故何也。且欲兼崇其學。使名其家。庶幾精義之弗淪。或謂異端之斯害。遲聞明辯。用釋疑懷。

問、經莫大于易、坎之彖曰、王公設險以守其國、丘明之傳曰、恃險與馬、無興國焉、吳起對魏文侯曰、在德不在險、後世拘文之士、莫不歎息起言、引爲鑒照、按堯都中冀、舜都蒲阪、夫豈乏德耶、曷爲竝據河山之勝哉、豈易之書、故不及春秋戰國一時之辯乎、蒙竊惑焉、顧問經傳交戾之說、折以至當、

銘頌

烈文卽政頌

聖文睿武、仁明孝德、皇帝御大器之踰年、改元乎天聖、協華寶歷、承光祖統、親朝長信、用漢家五日之儀、委成家宰、修商帝三年之制、德心克廣、孝思不匱、又明年新火再出、祥琴且御、皇帝慕孺軫悼、明發忘寐、顓居靖冥之館、眇思恭默之道、于時有位卿弼、樂親戶牖之坐、彼都人士、渴聞警蹕之音、懷思皇皇、若有求而未得、于是三府元老、諸邸皇屬、外廷表著之俊、周衛環拱之士、相與叩延英之閣、奉需頭之奏、且曰、上天之載、無聲樹君而司牧、聖人之寶曰位、代工而統治、先王知駿命之不易也、故光裕大德、以席先靈之休、知賢業之可久也、故卜建冢嗣、以系萬世之統、所以尊一王之大、固九鼎之重、三代之君、綽有令問、善繼志而述事、能祈天而永命、大橫啓兆、隆弈世之基緒、小心嗣位、昭前人之光明、用能登格皇穹、翕受遐福、詩書所嘆、簡墨攸在、陛下起元嫡、握神寶、典主震器、協星海之輝潤、紹休乾圖、恢天日之覆照、靜淵敦敏之性、泰定于德宇、緝熙光明之學、優入于聖域、播憲循于軌物、賦政諮于哲艾、躬承積累之慶、奉持

燕翼之謀。是以六飛御辨之辰。兩宮布度之際。表裏悅穆。上下安安。五土柔嘉。悉保于正色。萬物森植。咸極于崇丘。而陛下天姿粹溫。聖性謙亮。亦既禪除之制。彌懷孺慕之愛。金冊顯號。推洪代而弗刻。玉牀貴位。虛長秋而未建。上帝山川百神之祀。久俟翠華之來。咸池英莖六代之樂。未登端冕之聽。萬方企竦。羣臣迷撓。噴有夏蟲之疑。鬱懷旱雲之望。是宜推策迎日。先天奉時。攷帝典肆類之儀。舉王祭升中之禮。按元封刻石之事。建明堂受記之歷。紹建先憲。拱揖羣神。因斯而談。不亦休歟。上乃回精易慮。煥發隆旨。且曰。羣公元宰。告朕以祖宗錫羨之美。郊丘報貺之事。敢不親執圭鬯。以允天人之意。若乃陟仙閣。探神策。薦功魄寶。同符先帝。此事體大。未遑經畫。姑俟十五物來。徐議其可。乃命太史練日。儀曹具禮。因義車之南至。薦吉土之精享。御時龍之乘。備法物之駕。百靈扈蹕。齋于高廟。翼日寶校。次于帷宮。天光晏溫。日華明練。陳玉帛二精之物。建金石九奏之樂。聲氣遠條。坑谷皆滿。薦鬯之夕。絳光肅然。照乎馨黍之薦。奉以委山之瑞。神具醉止。禮成告罷。回一就之大輅。御百常之豐樓。大賚多方。與物更始。命廷尉。獨殊死之罪。詔大農。削逋租之籍。條中藏之繒帛。出上林之泉刀。第賞六師。均渥四極。旣而按羽林之寶仗。卽正陽之祕殿。華芝對蔭。暉幄竝開。陸載交于百重。軒樂周乎四面。萬國上計。儼貢篚而駢臻。諸蕃來朝。端寶鑒而森列。桓桓螭虎之士。峩峩鴻鸞之黨。腰假無言。相趨動色。因感祀之訖禮。譔徽名而紀德。丞相常伯。伏而奏曰。陛下日靖中邦。道躋先軌。率循大卞。附麗皇極。粵若右文稽古者。爲邦之丕教。而陛下陶化染學。崇四術六藝之風。不曰聖文乎。寧武圖功者。制世之深略。而陛下紘戎綏華。得五表五餌之術。不曰睿武乎。

仁者道之極。摯而陛下勤恤民隱。惠養含生之倫。不曰仁明乎。孝者行之難能。而陛下躬奉天經。宗樹錫類之本。不曰孝德乎。重以哀對上靈。申嚴大祭。煥揚盛則。丕擁龐休。冠德卓蹤。格天光表。而乃遵養景饒。逡巡懿號。是道大無強名之字。而天保失報上之誼也。謹疏淪靈腑。俾揣盛德。攷文金匱。鏤章玉寶。昧死再拜。奉徽號。上萬年之觴。帝曰。昔我三后。以聖神紀物。聰直在天。覆蔭本支。保右命歷。資承長世之善。充入舊貫之居。尙賴股肱之良。同扶樞極之重。天正殷旦。拜貺于郊。休氣薰蒸。福物萬舉。抑乃長樂寶慈之攸感。清廟先德之所及。而近臣庶尹。謬相歸美。不斷來表。俾享鴻名。一日萬幾。重增乎兢業也。于時持裳而歌呼。望雲而連抃。清光照于咫尺。佳氣浮乎鬱葱。皇儀慶成。謁者贊罷。上猶懼涉道之未淵。基德之未厚。漏泉之未及。覆盆之未照。退乃訪道宣室。程書衡石省。詳裁治體。總攬權綱。覩墨家節用之文。見老氏寶儉之語。將矯華靡之弊。獨宗簡樸之化。清心以聚政。絜矩以固本。底慎財賦。勸課農桑。存恤鰥寡。務休力役。減尙方工巧之伎。卻外府珍麗之貢。明慎庶獄。省察偏奏。文書調度。務從于簡寡。號令風采。顯尙以寬大。水衡舉池籟之地。公給細民。縣官疏鹽鐵之禁。抑從末減。譽髦斯士。悉取于廉孝。賦納以言。咸用于經術。體貌良弼。容受直辭。猶謂天下之安。忘戰不可。闔外之制。有備無患。更乃講練兵政。崇國防衛。保大靖民。竭歡而敦族。吏懷飭簋之潔。家象濯纓之朝。斯人有樂和之聲。緣邊無晏開之警。耕田鑿井。飲食充乎四鬴。鳴雞吠犬。煙火接乎萬里。洋洋乎韶盡美矣。郁郁哉文之治也。足以比榮太上。延光方來。億萬斯年。篤天之祐。下臣生長閭巷。霑沐恩教。欲治之主。逢享而甚難。盛德之事。詠歌而不足。私念嘗以薄技。

拔于諸生。方今採樵之夫，俱善談道。自古賦畝之士，不忘愛君，謹因筆墨之文，恭宣竹帛之美，形容萬一作爲頌曰：帝宋四葉，祖宗重光，乃神恭默，右序縣昌，承顏長信，御辨明堂，乘率先軌，總括懿綱，報本主吳，肇禋吉土，哀對羣元，敘時皇祐，瑞品紛盈，靈鳳翔舞，精意格神，孝思光古，豐樓霈敕，寶冊施名，龜疇建極，鳧鷖守成，功熙庶事，惠浸羣萌，億萬之世，永光帝紘。

斛銘

勿平其量，而平其心，心苟無邪，斯量之嘉。

〔案〕攷工記有嘉量之文，原本作斯量之家，誤，今改正。

論辨

四皓論

善乎子房之能納說也，不先事而強聒，不後事而失幾，不問則不言，有言則必當其可，故聽之易而用之不難也。評者曰：漢業存亡在俯仰間，而留侯于此每從容焉。諸侯失固陵之期，始分信越之地，複道見沙中之聚，始言雍齒之侯，善言子房矣。至于引致四皓，羽翼儲宮，方之齊桓公會合八國，定王世子于首止，事簡而力不勞，其績尤偉。而世之君子，乃致疑焉，謂審有此，是子房爲子結黨以拒父也。夫高祖駕馭，獨立爲帝，其才氣雄傑，豈四老人所能抗于漢廷？大臣力諫之強，豈不賢于四老人之助乎？是蓋未知聖人深許首止之盟，而稱管仲相齊，一匡天下之美也。〔案〕匡原本避宋太祖諱，改作正，今從論語本文。易干坎之九四曰：樽酒簋

二用缶納約自牖。先儒以子房四皓之事明之曰。人心有所蔽。亦有所明。欲立趙王如意者。高帝之所蔽也。聞四老人之賢。顧見而莫能致者。其心之所明也。子房用其明以去其蔽。是自牖納約者。宜其從之之速也。夫先賢之學。非世之君子所能及也。今據舊史詳載之。以見高帝免廢嫡之愆。漢家有父子之序。非子房其誰賴。且子房時然後言。言必有益。而前史謂良與上言。前後甚多。非天下所以治亂安危者。故不載。嗚呼。良豈有費言哉。

楚王城辨

障南之西北。距邑十五里。有古雉堞。曰楚王城。其形如瓠壺。其規千步。其高十尺。形勢存焉。城南隅有神祠。數椽。榜曰楚王廟。廟有斷碑。雖剝尙可尋繹。卽唐乾符中。晉川進士馬昌寓爲記。指神爲晉司馬休之。當桓靈寶之篡。休之自會稽赴援。築壘駐兵。以俟四方之集。其文穿鑿。無所攷實。余閱晉書。司馬休之雖封楚。居漢中。安得自會稽唱義。復按史記。吳王壽夢二年。楚之亡。大夫申公巫臣。怨楚。將反而奔晉。自晉便吳。教吳用兵。乘車令其子爲吳行人。吳于是始通中國。吳伐楚。十六年。楚共王伐吳。至衡山。杜預云。吳興烏程縣南。是也。土人語訛。呼曰橫山。其上猶有城址遺迹。則鄣南之墟。相去百里。猶有說焉。城之內。外耕者多獲石。戈矛箭鏃。余亦得其四五。禹貢。荊州貢砥礪。碬丹。春秋時。魯集陳廷。楛貫之。石碬長尺有咫。時人莫能知。而問孔子。不近取之荊梁。而遠取之肅慎。非獨荊梁不貢此矢。是知中國兵器不用石而用銅也明矣。則楚王安得爲休之耶。更俟博識者辨之。

序贊

靈芝序

噫。天壤之甄化。有自然之妙物。其名曰芝草。世不常產。根無定系。至虛幽贊。太和陶蒸。託寓而葩。表顯有德。豈非靈氣之所回復。神物之所護持哉。侍郎蔣公。性正道全。年耆德茂。往以致官。來還宰旅。天子崇旅俊乂。閱勞以事。進拜小宗伯。告于吳下。樹石三徑。溪館在焉。癸巳夏六月。地中產芝一枝。挺然發榮。匪茲匪植。芬葢卻邪。鮮明眩視。一之日。得土之正。其色惟戊。得太玄黃圖之象焉。三之日。受天之和。變彩而紫。得句曲燕脂之色焉。太守李公。賞異之。率賓僚宴其第。奉觴爲公之壽。復以靈芝榜其坊。公酢而賦詩。歸美于春秋之地主。吳士善詩者。隨而頌嘆之。李公見授以書。託志其事。攷之舊史。東陽以孝行。產于廬次。中牟有善政。生于便坐。書之聳動。揭以昭德。公才稱朝廷。名爲時宗。至德中和。表于履道。大雅豈弟。發爲政事。不登衰路。議者惜焉。夫芝。仙草也。道書載之尙矣。其或者以公之德之勛。謀謨弗究。欲其謠綺季之曲。樂義皇之化。誕錫難老。俾冒遐福。以明大有上吉。无不利也。宿視公。丈人行也。聞之欣抃。然不得侍几杖。爲壽于樽下。亦願以芝名公之館焉。

集賢給事俞公送行詩序

春秋之際。卿大夫出聘。鄰國交接。用微言以相感。必稱詩以見志。若七子之寵趙武。六卿之餞韓起。是也。

風有康公于渭之送。雅有顯父出屠之祖。瓊琚雜佩之語。以將其珍意。條革淑旂之詠。以發其行光。流風之來。所尙邈矣。集賢夕拜俞公。以耆哲之望。履中庸之美。風德器幹。作時從臣。逮事兩朝。間餘三紀。節任之要。則關中京右。載籌其筆。旂鎮之重。則渚宮錢塘。迭佩其紱。荆吳二域。政風相翔。寶元初。上嘉乃賢。特詔以觀。法官延對。勞問移刻。出從革輦。入陪禁幄。參麗正刊修之職。居東臺論駁之任。乃六卿之所履。二樞之與鄰。蓋將若時而柄用焉。公神守獨勝。天均默識。不以榮利滑其太和。頗勞侍從之班。少求偃息之地。謂宣城佳山水。美園館。喬梓在望。案牘差稀。可以瑩煩襟。養妙氣。三進得請。一麾遂行。朝右諸公。聳伏夷退。自禁庭雋乂之老。泊外朝庸敏之彥。或賦藻什。以謠祖帳。敍承明之厭直。美嵇山之還守。莫不鏗純命奏。追琢取成。皆韶武之祕香。荆藍之絕寶。比歌郢之曲。相高于國中。興臨滄之篇。竝傳于江左。足以廣高齋之逸韻。增黃堂之故事。宿承貺授本。辱命冠篇。絕大雅穆如之章。慚未學斐然之累。寶元己卯季冬二十八日序。

臨海梵才大師真贊

梵才大師。以實性會道。以餘力工詩。天聖中。至自台山。館于肇寺。朝之名臣勝士。莫不欣挹其風。日至于室。參評雅道。間印禪理。尋被詔譯館。訂正智者慈恩二教。及同編釋教總錄三十卷。七年書成奏御。賜紫方袍。未幾歸臨海北山。掃淨名庵居之。慶歷初。予自山出守吳興。師適有苕溪之行。得尋支許之集。自我見將二十年。雖正始之音。泠然在耳。而赤髭之相。邈哉難值。門人有繪其像持至都下者。宛具眉毫。若與

神對感舊懷遠。爲之贊云。北山大士。梵才錫名。禪離文字。詩陶性情。迹安林刹。聲動王城。學徒傳像。繪筆何精。秀氣閒遠。妙相圓成。此身有報。本體無生。月皎寒水。雲栖太清。龍華後會。聊記宿誠。

文恭集卷三十

書啓

上謝學士

某聞昔士擁薦賢之轂。有味其言。至聖開隆道之門。不與其退。布在方策。貽厥後昆。是以青雲彌高。猶垂可附之氣。洪鐘善應。不聞待叩之音。若夫駿望逸羣。高材拔萃。惠訓不倦。增激于懦夫。教思無窮。有警于淺俗。領先覺之事業。挺諸生之表儀。偃伏下風。講聞高誼。惟日滋久。乃心不忘。逃瞻京兆之門。恭贊許都之刺。伏惟某官。豐規冠世。高藻凌雲。蘊前識之道華。履中庸之德範。神檢清出。降乎崧極之靈。天性少成。鍾乃奎躔之粹。文兼三變之體。學富九家之流。邁天會之寢昌。標卿材之獨秀。平陽充賦。聯大對以飛英。法坐賦言。射甲科而得雋。茂恩加等。貢士有開。爰當精汰之朝。式隆出宰之寄。弦歌在御。寬小過而字民。鉞刃有餘。批大卻而從政。聊爲漸陸。式示牽絲。不變一同之風。洽聞三異之化。屬以堯雲修覲。漢闕拜書。奏東朔之千篇。名聞乙牘。獻子美之三賦。觀若堵牆。更生之言。有補于當世。子雲之論。不詭于聖人。食時之賦立成。洛下之紙翔貴。羣公無出其右。天子喜同其時。故得度越衆賢。對揚景命。校文延閣。勳太一之

威神掌故曲臺。顧后蒼之典禮。練達質文之統。周知沿革之綱。矧復奕世賢多。家公望重。處霜臺之鼎貴。奉雲陛之旦朝。周公拜前。更追故事之美。疏傳在後。未羨曩時之榮。會稽之綬。旣懷承明之廬。亦厭函分半刺。聿貳方州。習貫政經。用儒術而飾事。沈研吏道。宗法令以爲師。深素絲以在公。緩柔轡以馭下。道素自處。刑端益空。然而宜室懷賢。方佇賈生之對。淮南答詔。當用長卿之文。屬兩宮求治之辰。非一郡淹才之日。行聞三節之召。入聯四戶之榮。延企之誠。中外攸若。如某者。實同康瓠。賤比多珉。管仲之器小哉。安能任大。汲黯之慧甚矣。胡可適時。徒以西學隆文。南魚發詠。思樂烝髦之選。勉懷潔己之風。引重刻以自持。壯夫竊笑。學鼠能而雖衆。一技不成。願輪駟以莫堪。飭邊幅而奚用。爰披鳥跡之策。幾換鳳鳴之箒。仍且屢遭家艱。坐更歲舉。叔夜之不堪滋甚。原生之將落可憂。知己未伸。無林宗之三辟。治生不善。荒楊季之一廬。追時好而豈能謀藏身而不暇。姑欲脫名聲之鎖。棄富貴之轡。遠同魚鳥之羣。退避英髦之域。直以舜華載旦。周命維新。三代同風。克用直心之道。四方有志。未慚橫目之民。庶幾尺蠖之伸。更礪鉛刀之割。伏遇大丞學士。輟從周衛。關掌使符。慶惟桑梓之邦。蒙被潤河之福。加以冲襟玉裕。泰宇淵淳。樂育人材。克盡吹枯之力。獎拔士類。重嘉溢美之辭。咸預屬于徽猷。皆想見于風采。是用掣鈴下館。曳裾高門。不由左右之容。徑伸盤辟之禮。苟或履錐可用。溝木未捐。回珠吐以見私。枉鱗毫而垂飾。圯橋跪履。無成孺子之名。南郡橫經。請誌先生之論。誓將贈薄辱。辱在品題。

上兩浙均輸徐學士

某聞吾黨小子仲尼興斐然之嗟。天下英才孟軻有樂得之歎。斯皆樹微言于不朽。敦惠訓于方來。紀乎
油素之間。煥若日星之際。世未喪道。天誘其衷。誕鍾上智之才。卓冠生民之秀。若乃蚤持鉛削。夙奉師嚴。
以困蒙難擊之姿。被諄諄惟勤之賜。潛心大業。雖尅核以自修。從事華辭。終濩落而無用。載持篆刻。式叩
高明。庶幾一箴之言。未罪三隅之反。恭惟某官。骨含天粹。氣鏤神崧。直如清廟之絃。溫若白虹之玉。豐規
不難。粲邦直之三英。勝範自居。秉民彝之一德。自頃龍標得雋。鳳諾升華。金管第文。天子重平津之對。石
渠建議。諸老伏賈傳之能。雍容著作之庭。密邇清閒之宴。高文豔發。皆張鷟之青錢。湧思橫流。盡君房之
妙筆。故得爭臣進秩。右史聯榮。挺漢檻之直躬。造周官之華選。組垂丈二。旦趨紫閣之朝。牘奏三千。日伏
青規之地。衰無闕職。朝有正人。大君題柱以記名。羣公奉贊而結好。乃瞻三吳之內地。實處九州之上腴。
六筭攸司。鹽鐵之任爲重。八材所產。天地之藏實繁。不有計然之謀。誰佐大農之賦。薦膺神靈。出擁使輅。
紫橐記言。少別螭頭之陞。繡衣將命。遠輝使節之旌。酌寬大而撫齊民。用峻清而嚴屬部。疑獄所讞。多惻
隱而平反。貪吏畏威。盡望風而投劾。坐統十連之國。立富九州之儲。不廢清談。蓋出餘地。金華舊業。方任
于寶臣。羣玉仙山。適嚴于冊府。行看君節之召。徑入天坡之崇。當密贊于樞猷。豈久商于功利。如某者。資
材甚薄。性習不靈。會唐虞稽古之辰。隸鄒魯守經之業。從師鄭校。僅明六甲之書。露技吳人。會乏百金之
直。往歲以楚材擇秀。魯席聘珍。妄由窮巷之中。駿奔饒闕之下。因緣典謁。獲贊編聯。便坐橫經。許入安昌
之館。未行聞道。遂登南郭之門。曲敦提耳之私。屢獲鑄人之問。仍以類優之作。徧加溢美之言。持布鼓以

遇雷門。方將辟易。具太牢而饗海鳥。終用憂疑。未接武于諸生。驟纏哀于方寸。筮仕之門不及。歸恩之地無階。心疚自傷。生意殆盡。目見金城之柳。臂垂冥伯之楊。弧矢四方。雖夙齡而有志。蓬蒿三徑。奈短褐之不完。行閱市中之書。勉勤稷下之學。攻堅不銳。叩寂彌空。身世在心。有韓非之孤憤。江山滿目。多庾信之悲哀。追懷圯上之言。益厚胸中之愧。比者。國家以褭輪式命。刻鵠旌賢。遶下武之有開。思逃虛而安得。濫攀英軌。勉策驚蹄。懦夫之氣。寢衰大敵之勅。可畏。未能引退。竊望利賓。所幸者。學士輟仙殿之凝嚴。當外臺之委重。言念維桑之朽壤。獲居分陝之西封。重撫舞雩之冠。更露雕蟲之伎。頑疎自愧。迂闊無堪。重念夫操風斤者。無可棄之材。入蘭室者。被維馨之美。君子之所貴乎道。豈以言而廢人。善歌者使繼其聲。亦有教而無類。倘願盍簪之舊。未韜鄰燭之光。迴珠玉一唾之資。爲風雲萬里之助。左氏膏肓之疾。倚在一鍼。波臣枯涸之危。繫于斗水。誓將白日。庸答所天。卑情不任。祈恩望德。依歸之至。

上劉學士

自補吏中銓。待罪下邑。蟬得蔭而方美。且無執捕之虞。鼠忌器而不投。適在保全之地。俄奉計臺之命。俾臨樵木之酤。以弓見招。頗識皮冠之守。得微而喜。聊慰寒泉之心。自收迹于下陳。日馳魂于重仞。泛赤萍之江道。換丹桂之月弦。疲馬依依。仰崇軒而有戀。亡羊逐逐。懼多路以成迷。念素志以未伸。慨壯年之甫過。疾人之不忘乎起。抑乃常情。窮者之欲達其言。良難自默。敢布翹危之懇。用塵聰徹之聞。幸曲霽于威嚴。冀少停于神意。某聞士範教于閭巷。于以育乎人材。柄用歸于朝廷。于以尊于天爵。惟援能而是舉。乃

登善之攸先。漢世列藩之侯。得府檄而作吏。魏基大正之職。以州品而格人。皆所以廣王國之薦延。恢士林之賞拔。既周咨于行實。亦博練于才猷。咸經清論之高。以取當時之重。明試以政。無尹何往學之譏。薦登諸朝。有公叔同升之美。尙賢爲盛。往簡攸高。降及本朝。覽于前憲。廣籠茂士。上歸英毅之尊。擢引羣才。外委价藩之長。攷詳幹局。參檢行能。激官政以交修。統時風而歸厚。假人之名器。匪易磨世之礪石。在茲內惟浮賤之蹤。竊庇惠和之政。偃風惟舊。沐德茲深。固慚走俗之微。蔑有託名之所。將激昂于懦氣。願私附于高賢。伏惟學士術業周深。才謨高正。英辭惟敏。吐五河而並流。偉量克寬。吞七澤而不濫。家著元功之籍。世仰清光之臣。而自鷺序參飛。虹光垂照。備典午仙臺之構。掌卯金石室之圖。剖判藝文。講明憲度。獨當臺上之直。徧閱禁中之書。侍史執博山之鑪。日薰賜服。神父乘青藜之燭。夜訪成編。恬榮利以自持。遇沐休而不出。陳咸官薄。絕居方進之前。孟光年資。迴處釋承之右。武帳歎積薪之學。廣內厭直廬之勞。擁高箱而出關。肅將靈命。服毳衣而巡國。大按祥刑。平反有京兆之風。決囚多御史之雨。間屬愼求良翰。委重左符。佳夢發占。應獸頭之新舊。樂郊行部。煥車色之朱丹。體寬簡而靖民。篤中和而統事。庚桑用道。大移嶢嶻之風。魯侯尙仁。胥萃泮林之韻。動遵名教之樂。居多暇豫之娛。胡牀坐談。樓上之興不淺。陽春度曲。國中之和幾稀。重以誘接寒流。惇崇雅道。子將之風。鑒特出。每持鄉里之評。王澄之才。令相高。多爲士人之目。摺紳縻其德宇。當世仰其龍門。矧復最績已凝。上心所注。華林飾館。卽時當發于汝墳。宣室對神。半夜將前于釐席。入侍高門之地。並裁方底之書。罄伸造辟之辭。大展熙朝之業。某姿材甚下。人地並

寒衡陋是棲。乏高符而布世。河清旣遇。無宏略以佐時。自託跡于王塗。旋服勞于吏鎖。政經構昧。官守放紛。仕路濫巾。當宵雅肆三之始。銓臺攷課。有茂陵第六之羞。還守中田之株。復仍長府之貫。幸依屬部。獲備末員。少游平生。只自希于羣吏。騶奴等輩。良無益于縣官。徒以業在學箕。志存肯構。早竊幽邦之譽。誤爲前輩之知。聞勝母之里名。少諳趨嚮。對於陵之鵝炙。僅曉廉隅。然而力命不侔。功庸又薄。一躋仕版。三見閭餘。貧室屢空。將從孤竹之子。槁容日悴。近同吟澤之人。私懷趨府之初。特被均茵之遇。博以皇道。飫聞名理之談。接乃朱顏。迴曝溫仁之氣。自非木偶。幸食土毛。知恩紀之罕階。蓋生緣之內迫。惟此翻然之改。良非獲已之謀。伏望知府學士。膺棘垂慈。拔揚拒謗。寬鰥生之不逮。察愚守之無他。均被末光。保終前惠。篋庫七十。少紆薦拔之仁。臨履三千。永有吠鳴之地。仰依曠度。無廢瞽言。要以平生。繫于升墜。

上陳諫議

去歲入調中銓。駕言上國。匪由介者。得侍師嚴。登南郡之絳堂。生徒甚衆。對安昌之卮酒。禮數特親。固慚極陋之才。久事徒勞之役。奔波仕路。契闊講筵。挾策讀書。且有亡羊之懼。操刀學割。更懷傷錦之憂。寢負空疎。何從諮仰。旋罷休于末局。方欣附于美猷。虔瞻哲艾之姿。頓釋羈離之恨。洪鐘斯叩。每盡春容之香。後車見存。益隆教載之禮。關汪陂之偉度。軫墜履之深情。念鄒木之輪囷。未登器用。哀齊牛之穀觶。有惻仁心。延華譽于朝紳。引辟書于相幕。朋游改觀。身跡生光。恩自曲成。本噓枯而及此。事從中寢。繇連蹇之使然。揣薄分以自知。在所天而曷報。窮居京轂。坐隔親闈。不勝烏鳥之情。遂謀升斗之祿。結半通之吏綬。

竊歎喧卑。去數仞之師牆。轉成孤陋。辱五花之判筆。裁二雅之雕章。送子以言。掩雜珮路車之贈。投人于閭。屈夜光明月之珍。長北斗之虛名。耀南轅之行色。昔汝南舊俗。著子將之評。襄陽故時。重德公之語。皆巖野窮栖之士。非朝廷素貴之人。言論所推。材品攸定。況夫天民先覺之彥。德爵達尊之英。諾貴百金。望重九鼎。欸睡足以成寶。獎拔由其致榮。矧伊寒素之流。猥玷品題之目。拜承嘉貺。聳激儒心。自歸環堵之居。適有負薪之恙。曠馳謝檄。屢換鳴篳。背負刺芒。愧薄夫之不肖。量包山藪。冀大雅之見容。屬春物之芳妍。仰天倪之恬勝。伏惟諫議器博用大。道周性全。足文獻以居朝。基太平而展業。不吐不茹。氣雄衰職之臣。有德有言。名冠儒林之右。敷明治體。練達朝經。獻納論思。馴致中和之政。典謨訓誥。裁成深厚之風。將美居多。進忠匪懈。盡禮容而接物。恢德宇以服人。天懷發中。動循于教令。老成在上。未墜于典刑。方圖黃髮之賢。共秉紫樞之化。十旬遠至。將登荀爽之台司。百歲康強。更享衛公之壽考。上扶宗稷。大庇蒼黔。庶此孤生。永棲鈞蔭。勉加良食。行副具瞻。

上徐監丞

中阿著詠。本推美于育材。下體垂言。實戒遺于采菲。苟非躬茂育之至。持博古之心。則何以擢標幹以上升。慶根莖而致用。垂于風雅。蓋先民激勸之言。行自朝廷。實君子生成之德。其有久盤東鄙。偃伏大名。曳裾曾展于嚴趨。改席猥隆于渥眄。一介之善。俾延獎以居多。六尺之軀。誓報償而不忘。敢再稽于前典。將少述于丹衷。伏惟某官。西園上才。東序祕寶。朱紘疏越。含清廟之遺音。竹箭有筠。挺會稽之秀質。式邁亨

嘉之運。誕揚休令之名。而自玉帛賁賢。弓旌矜俊。紫宸試可。擢構廈之宏材。鴻筆飛英。奉揚廷之大對。黃香才器。處漢室之無雙。衡玠風流。居晉廷之第一。式膺寵渥。出貳藩防。當三載之陟明。奉十行之細札。彌茂思皇之舉。益隆乃眷之知。宜室問神。重賈生之應對。中堂落筆。驚子美之文華。旋通籍于蘭臺。復聯榮于仙殿。陳三山之圖籍。定四部之籤題。著鄭默之中經。洞分朱紫。紬馬遷之實錄。妙際天人。故當自西掖之升華。由內廷之將命。紫泥封詔。遠追長慶之風。青鎖承宣。密視淮南之草。矧僉謀之所屬。顧嚴詔以非稽。如某也。本乏聲猷。素無輪翮。繩樞少賤。非三川聲利之家。韋帶安貧。異七葉貂蟬之族。徒以真人撫運。王道興譚。奉鉛甄以自強。顧魯魚而不辨。七日隱霧。未遑下食之心。六月搏風。安有排虛之翼。既服勤而無狀。從鑽仰以爲勞。適值國家妙選時英。精掄鄉秀。詔書寬大。容庇迹于神臯。文雅縱橫。竟沾名于朝右。內慚狂斐。旁歎羈孤。蟠木輸困。既絕先容之助。勅字漫滅。徒興逆旅之嗟。因力綴于編聯。偶上塵于聽視。祗期倡優方朔。誠有類于枚舉。刻畫無鹽。亦深慚于西子。豈謂某官志敦善誘。道尙謙鳴。愍顏回之不愚。謂子房之可教。至以名公接席。多士登門。迴月旦之評。曲加題品。傳春秋之字。遽辱褒稱。俾寒灰之復燃。令困獸而思鬪。矧預最靈之列。豈忘佩服之誠。敢不淬勵縑緇。服從名檢。上以全公卿之奇遇。次則成父母之榮歡。如泥在鈞。更假良工之手。漆身爲類。永懷國士之知。

上徐舍人

故歲格越神聲。祗調天官。代舍食魚。早託寶榮之列。珍池浴鳳。式瞻鼎貴之姿。因持爵里之名。爰達巾幘。

之侍。均能引坐。捉麈談。久要不忘。遇加于獎拔。一夫未獲。深致于咨嗟。靡矜廉陛之崇。匪間斗筭之賤。禮容溫穆。德蔭恢疎。私慚驚下之流。本乏芥微之善。出菰蘆之內。安有美材。居韋布之中。早蒙屈體。飾青黃于溝斷。問朱紫于月評。水鑑論才。謬竊襄陽之譽。蒲葵振價。乃成中宿之資。足爲貧女之宵光。豈有家丞之秋實。濫偕時俊。猥玷科榮。一命牽絲。預陳咸之官簿。五年隨牒。過管父之瓜時。困膏火之煎熬。有鹽之窮苦。俛眉刀筆之吏。困跡風塵之途。擊踣曲拳。自厭莊書之禮。伊優骯髒。備嘗秦客之吟。自解去于官聯。旋入參于選格。小材累日。有長調以斯存。高足據津。無遠圖而自致。辱台符之次補。當民版之勾稽。去英雄所躋之都。事州縣徒勞之職。望鄧林而借樹。未獲棲身。歷吳坂以駕車。分甘俛首。其如辱交游之光寵。玷恩紀之薦延。年勢漸高。已嘆東隅之失。河清難遇。恐成大耋之悲。旋辭闕里之牆。歸訪隆中之舍。沈約之病寬韋帶。哀駘之肘臥垂楊。春服既成。邈阻沂童之舞。龍門不見。悅勞記室之心。職由疲薊之姿。絕奉硯磨之問。仰天倪之專氣。協神觀之葆光。伏惟副閣舍人。文炳鉤奎。識倖大蔡。特稟武山之氣。首躋王國之才。丹穴靈姿。絕雲霓而上擊。明堂奇棟。凌霄壑以自高。會東戶之顯時。蘊南臺之賢業。秉筆贊爲于名命。實代聖言。造辟入告。乎謨猷。允推君德。已茂寶臣之略。式隆赫尹之瞻。定草淮南。方警玉峯之署。調梅傳野。久虛金鼎之司。佇宣枚卜之求。以迪謨明之業。豈惟蕞質。獲託化鈞。抑亦輿情。僉圖大庇。願加丈食。永輔本朝。

上知府劉學士

近以隆冬聿暮。瑞霰其零。天粹融甘。屏薦瘥之故氣。土膏含潤。發豐懋之嘉占。竊欣時律之和。頗動春蠶之躍。因著擊轅之作。仰塵隱几之觀。學將落而有來。文久廢而無次。猪苓至鄙。奚登藥籠之收。鼠璞未屠。甘薦玉人之誚。周章失次。渙墨交并。豈謂知府學士。循誘疑懷。秉彝尙德。枉燕公之妙筆。裁漢將之清篇。灑雲朵以封題。遺犀髻而特遺。筠編悅發。繡段交輝。字截寸金。價超尺璧。少陵韓苑。悚避風騷之壇。咸池大章。鏘流杳默之韻。掩郢樓之絕調。詫梁席之諸賓。忘位貌之威嚴。樂名教之敦獎。過私月旦之品。謬借春秋之評。撫弱質以自驚。眷具僚而胡幸。昔者和尙書之什。樂天不繫于官資。答中郎之詩。盧諶亦由于故吏。著在舊史。用爲善談。悉由高世之才。方隆上笏之眄。孤生何者。素蘊缺然。蚤鑿地餅之名。濫竊庭鶉之食。陳完弛擔。庇寬政以爲優。元叔登堂。承高風而有自。素殮無咎。榮貶已多。敢紆正始之音。更重屈尊之禮。封殖嘉樹。比甘棠而不忘。投報木瓜。枉英瑤而太厚。伏惟知府學士。仙瀛高彥。王國上才。能讀典墳。過楚臺之倚相。老于文學。類唐室之次山。聊分銀兔之符。未陟金龍之頂。行趨召節。入綴近班。庶幾珠玉之篇。便爲冠劍之物。藏于魯壁。與經義而並陳。副在晏禮。期來茲而共祕。永言衡刻。匪克揔宜。

上蘇州蔣諫議

近削柔雨。恭塵侍閣。仰承左顧。迴篤光謙。託瓊蘊以致言。損玉音而流問。得孟公之牘。素所榮藏。比淮王之書。更逾苑祕。載懷降挹。彌切欽銘。屬時律之戒涼。仰道樞之協勝。伏惟諫議。風猷挺絕。字量粹融。抱式古之上才。厚當陽之渥暉。紫囊著位。蚤陟金坡之崇。綠詔宜風。薦領銀符之寄。甘棠載路。已聽于歡謠。華

黍盈囷。更聞于豐歲。行被節施之召。佇參鼎席之司。係瞻所深。庇暉有望。煩軼是拘。傾搖正劇。忽遘飛郵之便。猥流華牘之香。英眇迥殊。仰一謙之斯厚。至言可佩。在三復以攸深。載涉素商之辰。諒安純氣之守。伏惟諫議。體兼四德。識照萬殊。敷休績于本朝。挺豐規于上列。屢分方面之寄。益隆宸極之懷。賦政東藩。適著惠和之化。宜猷南闕。佇歸宥密之司。翹頌所深。序陳匪逮。

上李相公

某聞伊尹之格皇天。恥一夫之有失。周公之贊明辟。務三握以自勤。蓋由保乂王家。總司國柄。鍾鍾造物。上代于化工。履履任才。廣量于人品。俾洽至和之氣。用無太息之聲。故能享成德之顯稱。保碩膚之全美。文武未墜。歷百年而可知。聖賢相望。邈千載而非遠。伏惟相公。識探萬奧。體煥三英。強毅簡溫。日以宣乎衆德。和惠忠肅。世實濟其大猷。當永定之席圖。御明臺而訪政。紫宮命相。上配六符之星。黃閣秉鈞。坐調四氣之燭。魁柄斟酌。同北斗之在天。生民竦瞻。若南山之有石。率百官而稱職。育萬物以由庚。桃李無言。布清陰于天下。鹽梅有味。戒公餗于鼎中。間屬金七修明。玉關撤警。廟堂甘寢。無庸楫俎之師。藩閫于宜。益光社稷之鎮。錫山南國。賜履東秦。成功有不處之名。蒼生深未起之歎。旋屬中天降詔。溫洛改轅。卓匹馬而來朝。乘介圭而修覲。禁塗延對。左壺之漏屢移。法座疇咨。龍準之顏載悅。經火辨鍾山之玉。拭土見干將之鋒。元精所生。寶鎮增重。矧以地尊卜洛。府重居留。萬戶帝宮。備時巡而斯在。九金神鼎。奠國壤以備存。煩于謹之行臺。領留侯之管籥。商山調護。早深綺季之恩。漢閣規隨。夙盛平陽之業。將還舊德之食。

永固立賢之基。冠鈞席于宰庭。持靈光于永歲。上毗哲后。大鷹斯人。中外所瞻。爲日滋久。某性端幽昧。業蘊枵疎。世閱寒平。略無絃冕之緒。天衢巍煥。切勸方甲之書。棄襪襪之耕衣。習雍容之矩步。思風澀訥。學殖單疎。悼類驚之無成。苦食難之不飽。年稱甲子。未平絳老之疑。山過具敖。多犯魯君之諱。一昨詔開諸路。州舉羣廉。濫隨三百之竿。切駕一封之傳。遂偕茂士。猥玷榮科。辱吏牒之充員。在賤曹而受事。屑屑斗筲之役。悠悠風塵之塗。成嗇夫之綸章。起家爲幸。效南華之官智。宿業無聲。豈忘飭簋以自修。亦冀椎輪之有漸。嚮緣滿秩。訖獲交官。方隨上計之行。來赴東銓之集。公車下士。正感騶奴之錢。長安諸郊。未獲司農之鐸。幸遇相公。前趨大旆。來侍遽旒。衰衣詠我公之歸。赤鳥寵韓侯之入。夙仰宗公之望。想聞風采之嚴。迫位貌之甚微。苦聲猷之素薄。先談木器。早無萬乘之容。北首金臺。甘後四方之至。豈意紫垣之碩老。俯哀黃綬之幽蹤。持箕斗之虛名。達鈞衡之哲輔。聞樂切忤。私懽聳于佳音。懷響必彈。難括囊于中臆。重念某。仕塗艱梗。緒業漂淪。驚鳥趨時。切媿史公之論。君羹遺母。空持穎考之心。胸臆結約以亡奇。精神蹇淺而可歎。望青雲而在目。恨白日之無津。惟奇高世之賢。再奉持樞之拜。宰平衆職。總覈羣才。塊圯無垠。重啓大鈞之播。柔嘉維則。更流懿德之稱。庶依材館之賓。願預藥籠之物。儻塵鎔造。誓竭儒衷。

又

伏承台旆。就統英躔。聆溫綽之有初。企行臺而增慰。伏惟某官。爲國雋老。稟天粹靈。秉懿在躬。濟和及物。星樞席位。居常賴于謨明。帝室作藩。動必資于夾輔。矧龜蒙之巨鎮。乃鉅野之舊邦。實倚元勳。用寬東顧。

近在旦暮。入冠宗公。勉爲廟朝。益敦福履。

文恭集卷三十一

書啓

上江州張殿丞

伏自署吏南淮。整裝東路。背浮雲之高闕。過脩竹之舊園。適逢王國之才。得請天臺之告。上廬齋刺。竊沿雅故之情。密坐邀談。猥厚將迎之禮。言樞煥發。心府洞開。教督諄諄。迴暉秋陽之氣。燕胥侃侃。僅侵夜鼓之聲。迫中路之思歸。歎征車之莫駐。一別如雨。悵身跡之靡停。千里背淮。幾營魂之獨逝。來還堵室。伺守交官。芳桂攀援。山中之思無賴。春梅折贈。隴頭之訊蓋稀。允懷穆若之姿。屢下赧然之汗。自當末局。日力迷書。司民之版。掌實繁。將何批卻。舊尹之政。經尙在。得以伐柯。惟宇廡之恢疎。深仕塗之棲倚。曠伸懿仰。併積瞻翹。諒恬育于貞襟。固動臻于吉履。伏惟殿丞。性資上哲。名俊中州。仕版聯華。蚤協南魚之詠。禁門引籍。聿參翔鳳之朝。端勝範以照人。服清猷而高世。斯言無玷。本願行以相先。所至有聲。蓋試功之惟允。迺者秦川將命。漢傳鞠辭。財利是寬。出仁心之恤隱。訟喧既解。亦朝論之歸高。屬求刺部之賢。適下舉知之詔。需頭薦削。交集于公車。方底恩章。首頒于東省。矧溢城之名壤。壓江紀之上游。自守東平之廩。已報

營丘之政。追車降命。將聞二節之來。煩幄承光。行轅一臺之妙。某枵疎無狀。庇賴有年。奉言侍以末階。幸葆綏而適願。

上蔡龍圖

再調銓符。遠靡吏綬。山城僻左。謁居淮服之旁。人迹闕疎。鮮去日園之下。跂旌塵而殊邈。撫鍾律以屢遷。流水託音。久莫馳于尺記。高山仰德。未始忘于寸心。內惟筮仕之年。早詣序賓之館。三握髮而迎士。適振緒風。一引席以與言。猥參末論。仰荷深中之量。曲垂嚮下之風。旋收跡于門庭。聿抗容于塵土。日月云邁。歲星將近。于一終。節物再更。春日屢傷于千里。逃瞻姿度。遐鬱心魂。仰惟醴澠之賢。適處保釐之任。鎮雌堂而克靜。保虹氣以彌充。伏惟龍圖學士。德本上成。仁爲己任。元陽高識。出衆議以居多。次道宏才。結萬夫之所望。早侍法宮之側。並參端委之遊。直躬見于王臣。大略推乎國器。爰奉价藩之寄。用寬制閫之謀。南國是疆。倚梁臺而爲重。東郊出尹。降畢冊以爲優。自大旆之肅臨。實樂都之悅化。朝議蓋資于夾輔。師瞻益在于弼達。千室鳴弦。已播陪京之地。十晨易筆。行歸議政之堂。中外所祈。晝宵于是。伏冀順茲炎燠。務乃燕申。上扶宗社之靈。以慰華戎之望。

上馬少保

早隨毛檄。獲仕鄭鄉。仰天臺舊齒之臣。辭仙殿納言之寵。安石就第。獎元老以惟優。行馬施門。旌上卿而惟厚。間趨恩館。曾曳鄒裾。逃瞻哲艾之姿。仰霽威嚴之色。三握髮而迎士。式振前猷。一引席以與言。猥參

下綬。屈尊崇而展接。忘浮賤以見收。旋奉役于他邦。因贊名于侍閣。仍賜箋函之召。曲開宴俎之筵。荷盼飾以兼常。在心銘而罔斂。迫尸官之煩溷。惕奏記之淹違。方義馭之戒炎。仰莊環而處順。〔案〕莊環二字。集與孫秘校啓。有勉味莊懷。不經見。據本句。疑此環字亦懷字之訛。無爽味腴之道。益隆生福之基。伏惟致政少保。功煥太常。謀高前箸。勤宣

一德。有樊侯秉彝之風。逮事三朝。奮林父盡忠之節。寶名照世。惠政及民。方隆維石之瞻。俄請引年之制。三孤進律。峻周典之官儀。五福備身。享箕疇之陰騭。況簡在于上帝。方圖任于舊人。伉雙節之登賢。由小車而命相。永綏眉壽。上翊丕圖。中外所瞻。旦暮如是。伏冀爲國自重。

上祠部謝學士

伏自蟻准補吏。亟擁于單車。禮序橫經。驟遙于文席。流光逾迅。外役煩挈。嚮屬私奴之行。嘗修亭長之間。逮速郵之既至。辱溫教之詞頒。書意甚親。榮降孟公之几。字褒見獎。寵踰尼父之經。銘淑貺以無涯。拜高命而增慙。且有乞靈之意。猥煩下聽之聰。雖推轂之興憐。終觸機之爲累。鵷雛抗志。應增腐鼠之貪。龍斷圖榮。甘竦賤夫之誚。旋攜銳志。來自迷書。賦芋勞神。寢歎狙公之識。折麻寄意。空馳楚客之心。撫愧汗以自流。鬱煩襟而增結。兼審伏延英之上閣。奉永定之成書。聯三府之鉅公。攜一朝之大典。專春秋之筆。門人訥于措辭。奏新語之篇。天子爲之稱善。居然麟作。副在玉京。式均鴻霈之恩。用紀婉微之績。道家藏室。爰止于史官。太微積星。迺升乎郎位。矧靈臺之宏峻。且理窟之精明。清襟之篇。已歸于仲寶。黑頭之望。當在于王公。勉重青冥之期。勳進素絲之食。雅承誨矩。正闕師門。遐瞻貴秀之資。永有庇暉之地。

上小謝學士

關路師帷。奔趨吏局。滔滔江城。阻從一葦之航。冉冉年華。驟易四時之柄。雖復吳舫接尾。晉傳交塗。繭幅抒言。悵嗣音之久絕。鶴天寫望。徒蒿目以增疲。仰恩制之善居。用椎規而自處。載經素簡。克守沖機。恭惟某官。精識超殊。雄辭鼓動。豹文蔚變。駭帝囿之珍羣。璧采混成。冠天壇之粹寶。自聯飛漢牘。更直應廬。國典係其辯章。朝英以之欽服。入陪庭議。常謬謬之匪躬。出佐郡廳。每皇皇而求義。方稜鼎盛。業守俱高。適隆丹扈之知。遽結素冠之疊。杯捲如昨。諒至性以奚堪。霜露載均。幸衷懷之少抑。式安履用。以叩天光。某猥用薄能。資承惠訓。席間侍坐。飽聞談麈之微。詔下取才。首預歌華之薦。因緣慰藉。承被甄收。濫按策之分科。叨絲言之補吏。州縣爲職。揣鳧鶴以自安。冰檠在公。憂驚駘之莫強。庶幾卿蔭。施及危蹤。楚旆搖風。接辭顏而尙邈。汝評改月。求題品以未遑。系頌之誠。實邁常等。

上梅學士

近飭歸裝。爰經樂國。款聲姿而有舊。喜占拜以無窮。更僕乃留。久陪于譚麈。終宴不倦。屢接于朋樽。將迎之禮。過優。洪墨之顏。增甚。適旋冗局。驟隔雋鋒。未遑靡削。以致誠。猥辱丁寧。而賜教。蓬心所激。荷瓊意以無忘。蘭德彌薰。佩嘉言而不捨。載懷谷養。久格時休。伏惟學士。王國上流。天臺駿望。紳纓胥伏。閱閱居高。夙駕雙轡。未副材于雄寶。走趨二節。行被召于凝嚴。幸公食之勉加。佇恩綸之狎至。瞻懷所劇。布序寧殫。

上胡諫議

近者祗赴敵局。驟闕後塵。瓊樹瞻風。方懷于勞想。銀鉤布體。猥降于華牋。仰荷屈尊。敢忘拜賜。屬景文之貫序。諒沖氣以均和。伏惟省主諫議。密勿宜猷。浚明邁德。吉逢昌會。先展宏圖。總成賦于中邦。克昭丕績。贊大謨于近幄。行冠冢司。辱在獎題。倍深翹頌。

又

濫紆帝綬。關掌國財。一乘敵車。方駐北轅之役。十連大幕。匪遙東路之程。自跼跡于煩拏。闕致誠于摩削。猥蒙輝盼。先損函封。洒鑠管之珍詞。布朶雲之妙蹟。仰承佳牋之貺。俯盈感篆之懷。適臨朱夏之交。諒安純氣之守。伏惟諫議。高岡瑞質。東序瓊姿。識伴大蔡之靈。材任崇臺之幹。出入周衛。斷國論以優長。典領大權。宅王畿而平秩。峻坡上之華級。鎮浙西之巨藩。報政營丘。薦凝于丕績。攷庸大賚。行需于殊恩。勉葆懿和。用符欽頌。

又

近拜璽符。諒塵鈴侍。屬漕舟之特役。渴大幕之趨風。遠荷懿憐。嗣頒溫教。捧華牋而爲重。披緡旨以增勸。銘悅交懷。悚兢次集。晏陰協序。令朔告辰。諒保順于天倪。必坦寧于福履。品品峻望。式注于外朝。噩噩寶書。行催于召節。勉尊寢膳。用副瞻祈。

上馬尙書

榮臨制閫。肅接前旌。奏刺行臺。嘗登瞻于輝表。參謀支郡。彌薰疊于風猷。屬曹事之敷紛。媿箋問之疎闕。

仰高齋之笑詠。亮粹宇之寧和。伏惟某官。識貫神著。材表國棟。練朝章而精密。達治體以該深。帝幄敷言。運嘉謀于漢箸。師垣賦政。得良翰於周邦。圖動舊以在茲。握鈞衡而孔邇。勉遵福履。行契官占。淪滯之蹤。甄揚有所。企仰之素。寤想弗忘。

上晏侍郎

素簫迎寒。仲商紀候。四時爲燭。發顯氣之清英。萬寶得秋。極崇丘之高大。伏惟某官。對司神化。副掌天鈞。夙夜在公。秉賢猷而克壯。惠和濟世。翊聖政以惟新。居然內輔之臣。實繫蒼生之望。行踐上公之席。永扶太極之尊。蚤荷延銘。彌深傾禱。

又

迺者之官利局。假道京華。飾固陋以曳裾。恭修爵里。霽威嚴而開閣。虔接詞顏。嘗欽禮遇之優。稽拜箋封之問。茂涉迎郊之令。蔚爲生福之基。伏惟侍郎。業擅謨明。體包光智。參裁宥密之命。敷融政令之和。萬戶離宮。暫分于管簫。三公神化。方寄于阿衡。佇圭觀之修儀。由師瞻而正席。甄揚所託。系咏尤深。

又

近者漕車上計。爵刺修名。邇台座之榮光。深蒙委照。接山庭之粹表。屢獲承顏。霽鈞軸之威嚴。厚茵憑之禮遇。載旋冗局。驟隔後塵。戀賢館以回瞻。幾馳營魄。仰樞庭之坐論。彌富祺祥。伏惟樞密侍郎。識造動微。才周治體。逢辰萬世之旦。稟氣五潢之精。自入輔于帝圖。彌緝熙于神化。典樞慎密。襄天緯以在茲。賦政

將明位星垣而匪夕。資承鈞造。倍切頌瞻。

上分司李侍郎

近擁單車。適旋敝局。曠致問于左右。寢結戀于朝晡。自清暑之協辰。諒褒光之爲美。伏惟侍郎。望高肅哲。體具誠明。踐歷三臺。卓衣之朝有日。藩宣四國。甘棠之政在民。樂南華繕性之言。幕子文逃富之志。懇辭貴仕。榮保令名。方圖任于勳賢。佇冠居于台屏。夙叨題獎。倍積欣翹。

上安州范侍郎

寶魏全封。乾台舊德。地雄垣屏。朝倚金湯。惟參變于化鈞。諒同休于國體。節焉巖石。久孤師尹之瞻。是有衰衣。行佇我公之復。歎炎甫盛。頤護有加。欽嚮禱悃。誠無喻焉。

上轉輸許祠部

載擁高麾。來巡支郡。棠陰拂地。咸歌召伯之仁。竹騎滿郊。實慰并兒之戀。煦冬曦而愛物。傾丹府以遇人。私慚擊柝之才。竊庇柔嘉之德。宿官以業。旣乏臺駘之能。有文者東。復曠翁歸之美。仰荷汪汪之度。猥矜齷齪之姿。忘持斧之尊嚴。厚分庭之顧遇。其言有味。若炙輠之無窮。厥德之回。同輜毛之克舉。廣冀天而垂磨。昌燕地以生春。內惟浮賤之蹤。永刻獎提之貺。屬鳴騶之在御。思託乘以無階。悅別旌軒。坐移鍾律。思致箋函之問。想塵几閣之嚴。蕞爾幽悰。居成曠禮。惟溫陽之戒序。諒沖氣之在襟。恭以祠部。性本自誠。體資洵直。太丘道廣。躬博愛以能周。吳公治平。集茂勳而居最。旋領商功之任。蓋資足食之謀。三官之寶。

已充萬乘之知尤異。卽奉追車之命。行歸簪筆之司。日侍清光。冥升貴級。惟祈葆育。以副瞻翹。

上亳州李觀察

伏審觀察。近擁使旌。暫辭天陛。帝旒凝睇。乍別于威顏。侯關臨戎。適資于機略。龍靈加異。慶慰僉同。伏惟觀察文雅光朝。簡和濟世。聿修厥德。本載記之中庸。克壯其猷。協周詩之元老。爰從近列。式將廉車。四牡于藩。冀與區于景毫。百壺出餞。聳榮觀于都門。初宜條教之文。已載歌謠之路。哲艾之美。方簡于二宮。將明之材。佇歸于三事。未遑參覲。徒此頌瞻。

上高郵劉國博

近者奉役外邦。經途樂國。修名上舍。瞻傑表以彌溫。簞跡未行。挹清言而有味。軫懷楚履。展接融樽。矍圃之賓。且賢濫陪射鵲。太學之驩。已醉未許歌驪。篤英眇以迴深。刻幽襟而罔報。屬詣斗筭之任。亟奔星火之程。去丹戟之戎扉。別紫芝之眉宇。乃心增繫。惟日弗忘。在信次之甫經。諒宴安之克暢。伏惟國博材標磊砢。器韞高閒。學總羣言。游掌成均之職。政提衆目。遠符循傳之風。佇一節之恭趨。期十旬而遠至。勉精恬育。副是牢饒。

迎呂相譬

茂德格天。精忠貫日。才肩房令。居多應變之功。智比姚崇。允號濟時之相。〔案〕此下有闕佚。

答簽判張監丞謝及第啓

去夏嘗泛吳航。相植淮服。申尋舊好。略諸少日之留。契闊清言。忽成環歲之別。山間之蹊辟。左日下之間。闕稀。但懷想于盍簪。終絕馳于去牘。鳥嚶鳴于山谷。尙或求聲。魚相忘于江湖。無由煦濕。日者。通郵馳報。守邸傳音。初聆第課之勞。擢丞大匠。旋審攷文之盛。親策羣廉。升造秀之士名。協方聞之詔選。恩華舉集。才令喧傳。昭王涂拔士之賢。見文代嚮儒之勝。間年得俊。榮玉籍之再升。故事題名。美翠珎之雙刻。仍慶左曹之詔。來從下郡之游。同官爲僚。得名彥而殊榮。因心則友。緣夙契之愈深。矧營道之所同。固首公之無間。實有仰成之望。深慰索居之懷。兼審行已戒裝。將卽赴幕。開秋始肅。闌暑西頽。惟導養之有方。諒燕申之增鬯。恭以某官。才思通敏。格量淵虛。文素擅于天經。學皆優于師法。赴鋒車之勸駕。常被詳延。應拱璧之嘉招。早居參畫。勤績素聞于大府。薦函交委于內臺。會鷹伐于東銓。仍充賦于神甸。一登文石之陛。再至太微之庭。謁者臚傳。推湛恩而進秩。太常籍奏。程高藻以升科。用階萬里之途。實養一時之棟。親逢在旦。遠志莫涯。猥辱曩情。首貽榮牘。閱腴辭之溢簡。題淑貺以盈襟。念挹晤之甫諧。實笑抃之交會。行矣自愛。適茲願言。

與孫祕校

承服大名。從來有日。棲遲衡泌。闕略辭顏。豈期天陞之簡良。得預邦英之接迹。高山剝目。頓祛仰止之勞。清風襲人。可量穆如之快。尋沿官牒。來戾士鄉。且知星駕之行。已赴瓜時之往。雖忠信之室。近接于雞音。然名理之談。阻陪于犀柄。逃懷神守。妙集天倪。同年某官。識具深明。德華森茂。久著聲于俊域。暫養晦于

英僚巍煥之風。方開于聖旦。峻良之器。宜備于皇家。勉味莊懷。少符丘禱。

徐紫微問候啓

聞者修好。實鄰託蹤。後乘忝無辱命。良自依仁。旋赴局于南州。阻趨風于西省。尺題展問。迫煩鞅之未遑。下館翹心。觀饑虔之已甚。載瞻德履。允固道冲。伏惟某官。國棟挺材。天球薦質。抱周時之器用。蘊表世之文華。典命于右曹。裁成大訓。奉思于武帳。祇告嘉猷。被宸睠以方隆。竦師瞻而克峻。行參槐鼎。以右家邦。欽頌之私。度越常品。

樞密侍中間候啓

間者葱鬱之城。格修于王覲。熒煌之座。恭接于台光。旋回跡于曹司。日搖心于賢館。萬機兢業。方藉于弼遠。五福康寧。允鍾于嘉告。伏惟某官。大修厥德。夙壯其猷。爲一代之宗臣。論三公之至道。樂只流詠。式殿于大邦。良哉作歌。克康于元首。永毗寶統。長處師瞻。凡在幅員。僉同禱望。

知郡郎中啓

頃在內朝。驟瞻峻采。承入辭于幄坐。已夙駕于藩麾。顧通謁之匪遙。亦敍遠之莫及。瞻言尊府。素號名城。陶齊魯緒。餘之風居然雅俗。被龔黃寬簡之政。卓爾樂郊。几牘用希。神明增勝。伏惟某官。器能開敏。行義端修。垂紳早列于周班。起草久潛于漢署。西京循吏。甫揚豈弟之風。宣室邇臣。行踐論思之地。永惟系頌。實倍等倫。

運使郎中啓

博約之風。最適于文釋。惓勞之想。久積于咨驚。比辱教函。常銘謙眷。屬有羈牽之累。頗稽裁答之誠。必冀寬明。未繩曠慢。自素商之屆序。諒冲氣之臻和。伏惟某官。學迺名家。行惟高世。躬靖康而樂道。體深沈而著書。雅意在于本朝。未躋法從。直指銜于使節。猶滯美材。制異俗之跳梁。成遠民之安阜。佇疇茂績。并迓崇恩。未獲晤言。尤增冲塞。

知郡司封啓

伏自藩府出總。臺舸戒行。忽星歲之載華。悵山川之云邈。阻陪談麈。曠奉書郵。自宣布于教條。諒綏寧于戢福。伏惟某官。簡溫迪德。膚敏懷才。早登進于英髦。亟躋榮于禮闈。佐列侯之受計。歷典要司。領大使以宣風。聯今劇部。稍滯朱轡之守。猶稽紫囊之持。行奉詔除。入升法從。願言瞻禱。曷旣敘宣。

上淨覺啓

道風斯偃。法會且遙。企三昧之嘖呻。阻親慈相。叩一乘之圓頓。莫挹微言。徒馳資仰之誠。未收惓勞之咨。緬惟宴坐。增集吉祥。伏惟闡黎大士。夙植密因。廣薰衆德。以一音而說法。爲四衆之導師。踐應三吳。若優曇之出現。孝行諸部。等法雨之普滋。尙阻披承。可涯瞻結。

